

文學筆記  
部

# 西青筆記



書應社刊行

洞庭圖書室

上海图书馆藏书



A541 212 0019 7677B

序

予嘗讀悟岡先生華陽散稿而愛之。遂遍索散記而未得也。散稿中有與長公書云。去冬衝雪渡江。印散記四百卷。粉樓綠窗。索贈者半。又嘗云。墨耕琴莊。趣士也。游趣國。拈趣筆。吟趣事。與有趣之人。愛無趣之我。揮有趣之金。刻無趣之文。是猶玉勾詞客之刻散記。予將毀之。震亭藏之。而視融厭其無趣。起而焚之。則知是編固曾付梓。而未廣厥傳也。乾隆乙卯春。予在句容西序。句容與金壇相接壤。先生屢次來游。其得訂教於先生亦不少。意是編必有藏焉者。夏日訪裴若祉亭於綠野。首以是編相屬。祉亭素重先生。欣然首肯。越數年。爲嘉慶癸亥。祉亭乃以一編示余。展讀之。則先生晚年所手訂。刪繁就簡。十存其七。且深望世之知音者。翻刻以爲定本。散稿文各有篇。篇各有題。此則隨時隨地隨所遇而記之。皆散段。有詳略。無篇目。散記起於雍正癸卯。至乾隆丙辰六月。紀游西



山而止。散稿則始於丙辰。畧年至庚寅而止。庚寅者。乾隆三十五年也。蓋先生乙卯舉於鄉。丙辰未聯捷。丁巳成恩科進士。留京師者二年。歸耕者五年。官淮安教授者數年。棄官而游。散於淮揚間者將二十年。而先生年已耄矣。散稿之文。研鍊奇峭。中多排句。散記似先儒語錄而不腐。比前人筆記而尤雅。敷紱條擲。乞體稍舒。要其靈繡窮澹之姿。闡發激揚之旨。則無不同也。先生以筆墨爲生涯。以友朋爲性命。榮利之事。不入於懷。纓簪之族。不挂於齒。至遇畸人韻士。衲子羽流。天上仙媛。或世間才女。苟一事足傳。一言足探。無不感慨歎。提筆伸紙。悉囊括於散記中。生平交雖廣。而與吳長公曹震亭二人。最稱契合。故散記成。震亭序之。長公既刻之。又聯篇序之。於先生撰著深心。抉發透露。又何煩後人之贅語耶。惟予夢想是編。求之甚迫。得之甚艱。及其得之。則既係先生手刪善本。又得社亭雅懷高誼。卽重梓以傳世。則此一段翰墨因緣。固不可以

不記也。

嘉慶乙卯修禊日海曲馮金伯序并書

史震林先生所著西青散記一書。久已風行於世。坊間有就原文刪改題爲史氏筆記者。實改竄也。予愛先生之文。就藏書家及坊肆求之。數年不可得。乙卯冬。友人以瓜渚艸堂文抄本求售。觀馮君序。知係震林遺墨。蓋作於乾隆時。在西青散記之後。原名爲華陽散稿。且爲先生所手刪。乃亟付之剞劂。以公於世。改題曰西青筆記云。

民國五年三月潭溪生識

先生  
謝誌  
特此  
特助  
稿  
本  
由  
向  
本  
館  
來  
函  
索  
閱  
者  
至  
此  
爲  
誌

西青筆記序



# 精選瓜渚草堂筆記

原文係淮安府教授乾隆丁巳進士史悟岡先生震林遺墨。今得原稿。惜多殘缺。細加叅訂。選錄五十四篇。諷誦句讀。誠當世罕有之筆。鳳毛麟角。何敢秘藏。文人得之。無不奉爲至寶。客旅無聊。錄此以遣愁。覽也。

問松禪院。近市而塵不來。嘉樹幽篁。衆鳥欣托。悟逸長老。卓錫於茲。而院怡清肅。乾隆八年癸亥前四月。余與及門張夢旃。西遊華陽。訪句容俞挹霖。旣歸。綃山。夢旃賦落花詩八絕。將隨余東訪。悟公不果。余與姪旭賓及王景園造焉。遠望蒼蔚。乃十五年前所偶至者。時悟公未來。今更冷然也。後四月朔。詩人王淡園。趙鳳岐。趙闇叔。從隔西來。晤屠鶴岑。方畫龍。闇叔誦淡園句曰。峭角炤裂壁。龍氣團晴峰。爪甲連風雷。雨覆已萬重。錢橋上人寫梅花相贈。欲報以松竹。未暇也。一日掃榻。憇白衣金粟房。聽黃鸝聲。紫萁綠筍和雜英爲饌。錢橋上人與

悟公及諸居士同賦落花詩。兩箋月來。與落花俱集。可謂詩家衆香國。叅斷禪腸說消魂偈也。屬鶴岑作圖以記之。

乾隆癸亥前四月。與張夢旃嚴梅臣。詣浣虛子。僉挹霖于棠陵。信宿而返。登華陽之南岡。夢旃嘆曰。浣虛子爲雪而馨。爲月而情。從苦得仙。而世無蓼境。從甘得佛。而世無蜜境。煦以好生。萬物之淚以晴。梅臣曰。禪者若眠。夢以爲年。元者若顛。醉以爲天。浣虛子殆不然歟。浣虛子誦道士朱元萇落花詩而嘆曰。幻而真。春外春。余告曰。元萇子在元忘元。在喧忘喧。其詩云。水霞千點。松月半圈。晴峰一指。苔石幾拳。卽元萇照也。浣虛子憮然慕之。有王翁者。自號迴凡。食肉誦經。余勸曰。翁之饑。卽翁之凡也。翁再拜而除肉食。

華陽謫仙。實惟吾友。雍正戊申春。始晤君子唐陵。賦詩云。大鵬下擊南溟動。孤遊往往無伯仲。僉君瑣骨冰雪腸。天香漬神月魂夢。來訪仙娥趙素臺。夜叩華



陽折花送。趙闇叔見而詫曰。何以贈我。去年除夕。闇叔止余宿東湖。猶朗吟西顧。復太息之。謂須改命君作趙郎也。雍正十三年乙卯冬。再晤君。戊午春。三晤君。皆旋別不宿。君欲得余散記而梓。猶未成。庚申春。與趙闇叔張夢旃登茅山。北探乾元觀道藏。西謁玉宸。過白雲諸觀。重宿華陽。再登天市峰。西望唐陵。闇叔誦瑣骨天香之句。以爲既見茅君矣。天上之歡。未見愈君者。人間之恨。揖雲而嘆曰。昔王伯瑜登茅山大慟。呼云瑯琊王子。終爲情死。我趙郎然耳。而夢旃亦恨不能同訪仙娥折花夜送也。自戊申距庚申。歲忽已周。而余其間。聚學三年。散遊四年。公車客長安二年。登第歸耕者。至今忽復五年。碧落紅塵。竟此忽忽。笑耶淚耶。悟何人。救何術耶。今年壬戌秋七月。王隆栢來洮湖。道君無恙。聞君低徊佛韻。繾綣仙芬。甘心縹緲。作世外人。歲云暮矣。萬象蒼黃。山霧如醒。湖天似夢。釣船破枕樵舍欹床。有夢造君。無人知我。馮嶧陽詩云。夢裡尋君君見。

否。夜深寂寞過牆來。余則有句云。同心但有人相憶。夢隔青山未是孤。與君跡  
疏神密。生平草草。幾往還而心常數。君口常誦君雪意。漸親梅花不遠。欲謀空  
谷。再補散記。采簫人胡未遑耶。此與句容俞挹霖書。

邵一菴毗陵人。治形家言。性篤實。不忍以地誑人。道吉凶無訛。與蒼如上人善。  
遊孟河必主之。有以百金延一菴卜穴者。主人曰吉。一菴曰不吉。或曰厚利也。  
姑順之。一菴戚然曰。奈何重百金之利。而輕五世之澤乎。天下有三無恥。而每  
以神明事之。謀館如鼠得館。如虎鄙主人而薄子弟者。塾師之無恥也。賣藥如  
仙用藥。如顛賊人命而諉天數者。醫師之無恥也。覓地如瞽談地。如舞矜異傳  
而謗同道者。地師之無恥也。其誤人也易。而其自罰也速。天之所弗宥也。雖其  
誤無心。然逞無本之學。以恣無心之毒。有心則可以悔而不爲。無心則終於爲  
而不悔。自以爲是而無所忌憚。乃小人之尤者耳。奈何重百金之利。而輕五世

之澤乎。一菴謂蒼如曰。祖塔有水盍遷之。旣遷。一菴推以遁甲。歲壬子。土木大舉。是年果建北樓。陳星野題曰。梧月。明年復建祖堂。廢室皆整。乾隆辛酉十月之望。荆振翔鼓琴梧月樓。

乾隆四年己未冬。晤曹震亭於廣陵。賦詩餞余。渡茱萸江。探方可村。宿於因圃。早梅花側。相與成世外交。而梅花實証此盟也。歸時持可村詩卷。遡風截江。緼袍爲高浪所潑。明年春與趙闇叔張夢旃登茅山。雪阻元娥故里。念可村有華陽之約。嘆不此偕。誦其句云。往事總成蝴蝶夢。新詩消盡海棠魂。書生混迹魚鹽市。野客投荒雁鷺村。闇叔爲嘆。是年冬至句。詞客吳長公。探余於洮湖。余附可村書未達。辛酉春乃達之。而可村亦遂來金壇。禮茅君於句曲之峰。余不及與。可村有詩贈白李仙人。余惜未見。殷霞村亦以不及和爲嘆也。是年冬。余渡梨花江。探憚甯溪。巢納齋別駕。劉萊村於海陵官舍。爲誦可村詩。時因圃舊客。

臧南園移家東陵。慨然嘆可村爲浩蕩人。而因圃早梅惻惻問無恙者。即可村所云昨夜夢中好詩境。不知是雪是梅花也。今年重九後。與殷霞村陳星野別。詩人王淡園曹礪山朱元莫。出南城遇雨。雨行五六里。雨中吟可村雙樹昏鴉盤。古屋一鞭殘。雨落孤村之句。雨如浴。不爲苦。夜投破菴。燎衣擁草。復爲霞村吟。不愁日落遲。沽酒且喜年豐聽晚春。匝月苦尋佳處少。入門真覺老僧閒。細路不妨黃雀雨。輕帆却受鯉魚風。等句。跛僧不識字。亦三嘆之。霞村笑曰。坐久但餘詩有味。可村之語信哉。星野問曰。可村夢遊圖。君爲題否。余曰。雲霧如寐。風濤如鼯。草木如瞽。禽鳥如讎。吾輩夢短。造物夢長。古今大夢。誰其先醒。可村寂不違。紛瑩不淪。璞讓不干名。施不邀福。道見寒飢。數顧咨嗟。趙閣叔所云。滿腔惻隱皆詩思也。

乾隆丁巳冬。同曹震亭出都。至廣陵。晤玉勾詞客吳長公。許曙峰。李于亭。留躡

月慕眞州方可村。寄詩云。紅塵到此皆成雪。欲向詩仙借化工。可村和而慰余。憶予雍正己酉。與震亭父子。及其弟宅英。避暑栖霞山。過眞州。玩東城荷花。是時已知可村。而洪月航。李餘中。李潢士。施味冰。諸君子。震亭亦時時誦之。不期後數年。成松柏交也。壬戌晚秋。蘊愁山隴。四望無極。憚甯溪。巢納齋。客遊海陵。趙閣叔隱瀟湖。玉勾詞客厲慧泉。震亭臥黃山。音問疎渺。而于亦唐讀書因圃。每歸致可村消息。爰寄可村詩云。霜葉如花夢中蝶。聊復栩栩髻山餘。照絢彼孤霞。野氣自體。湖紋未冷。漁帆幾疊。與低雁爲參差。偶偕曹碣山。殷霞村。王淡園。陳星野。訪菊造山菴。白酒初漉。侑以紫松。欲謀旃檀仙秣。持贈可村。靈種浣荒。竟負前約。而華陽洞天有石田半畝。瑤草不登。須俟東海作桑田。少貢詩仙酒米。望何遙也。大江南北。知己二三。如可村玉勾震亭者。皆自混茫以前。成此有情魂魄。劫萬灰而心一蒂。蓋亦換天地而不換梅花者耳。遂成句云。多病隔

江人稽首。春前醫我是梅花。

淳湖之遊。速余者句容王孟宣。阻余者孫文廣、倪叙湖、張夢旃也。乾隆乙丑三月之望。孟宣再至金壇。舟溯瀨水。過南渡西二十里。旱久水涸。易舴艋。廣尺有咫。長二丈。俗名漾白船。自淺口抵東壩五十里。擿行泥上。車過胥江。轢固城湖。以至淳。淳無城。迎入薰門。主溧陽姜光衡家。其先世慕義好施。相繼孝友。無市井猥薄慳詐之習。又多好生。能惜物命。故自溧徙淳而家。以挹。邑東爲遊山。南數里有小山曰禪林。形獨娟秀。余易其字。仍其音曰嬋玲。西爲孔氏里。句容俞浣虛所識孔次歐、檜亭兄弟。以仁讓好禮著於鄉。多蓄趙泉竹石圖。趙泉者字難涸。太平當塗老明經也。年七十家貧。三子繼天。一孫病瘵。泉博學工詩。寫竹石。疎宕有奇氣。市人弗喜。或乘其窘。擲錙銖而艸芥拾之。泉每拳筆刺天而嘆曰。嗟乎。奈何貴米顛富。倪迂而坑趙泉哉。時或酒後激昂。裂紙畀火。罵錢奴爲

豕。虱。吐。腐。儒。爲。溷。鼠。喜。之。者。輒。苦。其。狂。而。泉。亦。不。屑。也。孫。文。廣。曰。富。者。膈。爲。齧。鼻。爲。突。唾。爲。醪。淚。爲。膏。惟。懼。人。之。餌。之。也。爲。宮。室。急。豚。柵。而。笑。書。塾。治。生。理。貴。備。役。而。譽。師。友。廣。廈。華。棟。費。金。累。千。聯。於。屏。者。寡。墨。香。賓。於。座。者。悉。銅。臭。君。宜。慎。所。遊。也。余。曰。雖。然。殆。將。探。山。水。訪。高。隱。以。自。放。焉。

乙丑寒食將遊石臼湖。張夢旃來瓜渚艸堂而嘆曰。墨如泥。筆如草。可以樂飢。鮮可以飽。夫鸞不擇山。必垢其羽。虬不擇水。必穢其鱗。余曰。其神滯則太虛皆窒。其穢忘則叢棘可安。至淳居市樓。塵喧徹曉夜。賦詩寄夢旃。託致張石鄰。殷霞村。馮嶧陽。曹浣香云。南遊聞說好春華。柳葉輕舟盪淺沙。正是落花三百里。白蓑紅雨過山家。市塵得雨未全收。乍暖還寒近麥秋。燕子不嫌人盡醉。定巢偏在酒家樓。迎薰樓上送春時。何處尋花得幾枝。却有晚山青似笑。偶然成畫未成詩。固城湖之南有玉泉山。產牡丹。歲無常處。開時士女爭集。淳遺老邢孟

貞曾咏律句。余以絕句託徐愚谷題絕壁云。湖上登樓見遠山。有詩無酒訪花難。年年空谷春何在。不在幽蘭在牡丹。徐愚谷長洲名士。名堂。字玉臺。爲句容司訓。先世富。以行義而貧。有貧而入泮者。弗取贄。更資以金。時再攝高淳教諭。篆俞浣虛嘗稱之。余題其扇云。綠陰如水滌紅塵。湖上無愁放此身。今夜送春憑有夢。柳綿鋪處禮花神。黃鳥如何得好枝。杜鵑爲友鶴爲師。先生本是梅花骨。猶喜梅花可贈詩。其婿陶宣萬亦佳士也。孔次歐許召北魏敬涵俱來會。四月朔。次歐三迎余。以散記爲詩寄之云。一卷西青世外緣。此情何處好重宣。鳳凰只在琅玕樹。須向人間聽杜鵑。造其家旬日而返。次歐子東木。年未冠。清粹不佻。受業吳匠珂。珂淳之名士。和夢旃落花詩。

土山戴石高里許。升其顛。西望當塗。南望宣城。羣峰遠近可指。惜同遊者莫得其名也。北溧水。東溧陽。山色在有無中。非霽極不辨。山之南近爲固城湖。青草



滿之。西遠爲丹陽湖。石臼湖在其北。有水如帶。時久旱蝗生。來牟甚渴。余悵然思歸。題詩石上云。涼滿峰頭晚。眺遲。天風吹面月生時。題詩付與雲東去。飛到蓬萊未可知。峯頂有仙人曰。昔神僧居此。曰自出米。後有鑿之者米絕。下紫砂巖。造僧舍。留詩云。野寺尋花到處殘。倦憑枯樹勝朱欄。人間富貴眞無味。誰與山僧畫牡丹。有僧名代來。其徒靜涵。玉海頗清逸。嗜書畫。招余茗。同吳匠珂。孔次歐。孔敬孚。赴之。次歐云。僧院十餘所。惟代來可與言也。一日脫冠服。率意獨步入山徑。路迷阻澗水。涉之至村店。題詩云。萬綠生涼晚。漸加山溪。因誤却逢花生。平恥學劉伶輩。偶爲薔薇到酒家。吳匠珂登仙曰。峯西望黃山而嘆曰。誦曹震亭日月觀。天開巖極樂。峯諸咏。幾欲盡燒李杜王孟以後詩。奈何世間忽有此奇句也。賦詩云。深蒼遲雨後春開。三兩游情倩軼才。望眼不嫌收拾盡。千層濕翠上峯來。余易禪林爲嬋玲。匠珂稱善。湖南有禿山。邑人病其名。易名曰

秀。其南爲牡丹山。上有玉泉寺。又南則遠峯聳疊。或曰宣城。或曰廣德。匠珂又詩云。偶然塗抹滌陳因。新製霓裳曲裡春。數到雲邊峰秀絕。按圖可是昔高淳。花情三復酒清濃。萬緒低徊半晌鐘。回首石湖光不定。一帆消息在西峯。復留詩。代來僧舍云。爲從雪屐醉禪房。披盡丹青陟翠岡。燕剪輕雲湖上落。數聲疎雨剩斜陽。匠珂之母孫氏。苦節教子。年七十。太史楊繩武爲文壽之。匠珂餼於庠。事其母以孝聞。

客有欲謁富人者。倪紱五笑曰。是直窶人耳。吾聞之嗇於財。豐於德者。君子所師也。富於利。貧於義者。君子弗友也。姜光衡曰。彼其性吝於貧。刻於貧。多疑於貧。鮮恥於貧。王孟宣曰。更有進焉。不惜名譽。頑於貧。不慮人怨。妄於貧。不畏鬼責。無忌憚於貧。乞於天。思竭其膏。丐於地。欲刮其毛。無爨足於貧。是惟致一時之富。而成無盡之窮者也。紱五自句容來。余以詩送其歸云。去年相訪共登樓。

滿地雲黃麥正秋。石臼湖邊一回首。落花如夢記春愁。甲子三月與張石鄰。王雲古。毗陵巢訥齋。訪張夢旃。嚴梅臣。俞浣虛。倪紱五。將同泛石臼湖。孫廣文勸無行乃止。今獨與王孟宣來。數夢故人於落花中。何慨然也。旌德戴季仙。能文章。工鼓篆。索余詩云。何處猗蘭有素心。石湖南望落紅深。送春肯鑄花神否。但選旃檀莫選金。宣城孫義齋初名式。後名國琳。甲子秋闈中。託曹浣香致余書。屬孟宣報以詩云。略趁東風報寸函。送春今在石湖南。莊生每夜成蝴蝶。遊遍蜂衙味可甘。今年上元後。曹震亭上公車。義齋送之至廣陵。余別震亭已八年。所至輒思。思震亭與思趙閣叔同。在登臨時爲尤甚。而聞震亭而思者。遍所至也。邢九相者。孔次歐妹婿。吳匠珂友也。貧而立品。會於嬋玲西麓。贈其別云。南湖無水草連沙。此地重留玩晚霞。明月滿臺君已去。春愁交與海棠花。過淳西菴訪僧淵澄。過耿家園瑞花菴訪僧體妙。俱無詩。

授疇名璞。長洲人。磬莊先生子也。磬莊與蔡忠襄金正希從學新安雲莊程子。既老。屏跡于羊山。程子墓廬。蓋嘗獨居三年者也。授疇至。性過人。年十二。負米數百里外。自炊飯和羹以養父。父歿。乃爲萬里遊。歌大江。頌黃河。徒步三千里。遊京師。過泰山登焉。宿日觀峯。候日出賦之。時方弱冠。康熙癸巳歲也。其明年復南遊。問道山陰。泊富春江。咏子陵釣臺。跨桐廬。上龍游。環江郎之山。度仙霞關入閩。浮舟下延平。倚天柱峯。歷危灘數百里。駐甌甯。望武夷之曲。道仙遊。出晉江。梯白鬪嶺。憩永春縣治。食荔枝。避暑於大鴨山。至漳浦。俯漳臺。鼓棹出廈門。觀海而還。所至州郡。當道者多磬莊先生門下士。至輒去之。所過佳山水。則留詩。謂如我意中人也。性好施。於漳見二客。資其窮。復見於廈門。或曰此僞也。授疇曰。是億也。毋甯受欺衆以僞億人。所以愈無告也。度嶺。老幼擁輿而啼。給以錢。或曰衆不遍將詈。授疇曰。身有疾痛必救之。吾救吾心痛耳。至武林方飲。

艷妓來。弗狎。慰而悲之。妓泣。以酒酹地。曰。夙孽也。奈之何。有憐我。以欲無憐我。以情者。况憐我。以義乎。授疇嘗言獨居時。每忽忽成感慨。見貧苦人。淚數嚙。意更無聊。天壤間。有我癡絕人。當肝膽贈之。魂魄殉之也。戊戌秋。復北上。時方修古今圖書集。成一萬卷。當事者薦授疇修閨媛典三百七十六卷。廁名者皆得官。獨弗及。蒲城屈悔翁爲作崑崙嘆。雍正壬子冬。詔求賢。侍郎陳慈田薦之。得監督與平倉。尋被劾。仁和姚侍郎舉授疇。應乾隆丙辰鴻博科。辭不果。授疇與陳散樗相莫逆。喜歙州處士宋介三文。與屈悔翁詩。散樗介三歿。於悔翁益縉。縉居都下數十年。窮益甚。年五十未娶。昔所聘已死。後聘毗陵女。將娶。以罷官而止。一姊名婧。赴都就食。婧能詩。年三十始嫁。終爲薄命云。

雍正己酉春。識散樗於廣陵。目余爲國士。愧之。庚戌曹震亭會試。散樗求其詩未答。乙卯聞散樗卒。震亭有詩云。蕃釐別院苦吟身。瓊樹全枯感慨頻。能向塵

中憐國士。竟從天上泣。詩人。冰霜楚畹滋。蘭夜。風雨彝門執轡春。秋色到今悲。勝昔。寒蕪如錦菊花貧。易簣時。屬家客。傅振華至江南。請余爲墓誌。誌云。嗚呼。此散樗夜臺也。散樗。畜於仕與年。功業無所見。請誌其言。謂余曰。名不符實者。天所成。實不副名者。天所傾。宜憂勤以求實。謙退以讓名焉。富莫樂於濟貧。乏貴莫樂於拔孤寒。自損者天所益。自屈者天所伸也。士大夫飾車服。炫辭令。則奢佞滋。樸訥者。導人於儉。且質也。嗚呼。散樗而壽。豈竟無功業者哉。散樗。官京師。雍正辛亥歲。以省母歸楚。壬子病。賦悲秋行而卒。名樹萊。字瑤田。長沙湘潭人。恪勤公陳鵬年第八子。母王氏。少司農樹萱之胞弟。己酉。孝廉樹葵。刑部郎中。樹著之親弟也。年二十有七。無子。妻江氏守志。銘曰。浩浩兮楚天。死爲才鬼。亦當勝於頑仙。

秋草者。屈悔翁詩也。悔翁。陝西人。鯨而爲客。客蜀。客晉楚。旣而客吳。年且老。北

上客燕趙。既倦。止京師之湘潭書院。依恪勤公之子。刑部郎中陳樹著。都人素聞梅翁名。喜其至。王公以下。交贄於其門。梅翁年已七十。鬚眉皆白。方袍赤舄。著梅花錦襪。登座說詩。諸名士肅然環聽。長洲馬授疇。與曹震亭訪於都。請其集未刻。少時有刻者。今毀去。授余秋草詩十首。詩云。天盡平蕪匝地涼。玉門昨夜有微霜。望中白日寒山上。愁外蒼煙古道旁。西去關河連絕塞。南歸鴻雁叫斜陽。茂陵客有劉郎否。萬馬蕭蕭獵未央。角弓風勁更誰論。一片寒蕪似錦茵。難與綠莎遙鬪色。那看黃菊共爭新。踟躕徒使藏狐兔。搖落何須泣鳳麟。見此茫茫驚歲晚。登臨長憶故園春。迴風動地萬方前。黃落何堪眺霸川。踏作塵埃迷四野。遙隨車馬轉青天。陶家三徑應成恨。漢代諸陵倍可憐。垂老有情思故國。榮枯果否似當年。露深長信離宮靜。火燒咸原白晝昏。海角無端歸燕子。天涯終是怨王孫。沾衣路狹長安道。曳履城頽古塞垣。悲向西風曾作賦。適來南

浦更銷魂。蒼涼日日喚愁生。不雨陰寒不擬晴。縱有腰鑱傷歲暮。曾無烈火懶  
山行。惱儂攬結三春事。悲此凋殘萬古情。多病遊人頭盡白。百年容易暮雲平。  
萬里荒烟萬里悲。東西南北更何之。蓬飛畦隴崑崙轉。風動蕭森海島吹。雞犬  
不鳴荆棘早。田園有跡雪霜遲。只應莎草寒猶綠。腸斷春明鸞鳳池。李花歷亂  
最青葱。無意迴颺刮宇中。冀北霜華常七月。燕南袍色遜東風。誰家陵闕荒殘  
照。何處牛羊見故宮。時序已宜蠶樵採。江天猶自滿寒空。水眞衣帶魚龍夜。山  
似蓮花翠綠枯。白露爲霜幽徑冷。六朝如夢桂花孤。不知蝴蝶飛何處。尙有蛟  
虬繞敗榭。桃葉渡邊猶旖旎。瓊瑯大道弔蘼蕪。大江北望大河流。河畔烟霜動  
客愁。欲問夕陽空照水。深知遠浦不勝秋。彝門今日悲前度。梁苑青時恐白頭。  
記得落花曾有恨。蕭條中野古神州。中天白露尙溥溥。滿目淒迷忽已殘。平野  
經時鉏未盡。深閨幾日鬪方闌。風吹禾黍行人少。水涸池塘曉夢寒。不是一番



霜有信。樵青安得倚雲看。

丹陽老人沈一清。字東井。生而具戒。年近七旬。志行彌苦。雍正九年臘月二十日。登小茅峯。獨坐禮星壇。以荆棘爲屏垣。雲霧爲棟宇。枯枝爲柱杖。落葉爲蒲團。籙冠蘿帶。旬月休糧。積雪埋肩。鬚髮冰結。山鬼羣嘯。虎狼互號。閉目觀心。身與石化。時維春序。大茆峯司命君聖祐觀。及上宮諸院。管絃樂神。酒茗娛客。焚章電合。鳴銃雷交。檀蠟金錢。不可數計。而中茅峯定錄君德祐觀。小茅峰保命君仁祐觀。積歲無人。門徑頽塞。列眞露坐。金蝕苔生。老人乃自運斷甃。雪月匍匐。衽爲畚成結。指爲鐫見血。夜半則臨崖危坐。默誦皇經。有異聲慘於澗。異形突於巖。祝而遣之。聲絕形滅。黑暈俄霽。方是時飲水無盃。煮石無釜。餐松無藥。采蕨無萌。有林道人欲留相助。束手咨嗟。未幾物故。老人募棺負土瘞之。性復好施。偶得齋米。輒以濟貧。雪中施烏雀食。皆馴如鷄鶩。獐避獵跪階側。老人摩

其首救之。其忘機感物如此。苦行五年。而善緣四集。於是仁祐殿以新。乾隆癸亥秋。重建德祐殿。費千金。工萬計。一柱登峰。百人邪許。其徒有陸心如、李真如、錢本茲。皆相繼入山。稽首誓天。協成悲願。富者忘吝。貧者忘懦。初仁祐殿既脩。雷電夜入梁棟。繞龕數匝。炤掣眉端。乃破西柱。揭鷗尾而出。老人坐龕中。神自清恬。意無恐怖。論者以爲自漢以來三千年。中興第一人也。其先有撒仁祐之樓五楹。以爲桶。有毀德祐之材以爲棺。復有募資還俗。皆以娶婦。先後殛於神。自數其罪而死。華陽逸士嚴梅臣曰。中茅峯旣廢。王道人斷臂苦募。反被譴斥。而獨成於沈老人。以信之者素也。老人未入山時。居小菴。力耕自食。每雨雪則扶杖歷野廟。問丐者疾苦。爲粥以賑之。所居必整廢拓隘。儲粟繕器具。時脫然讓人。空手徑去。謂人曰。有衣餘笥。忍人之寒。有米餘困。忍人之餒。非乾父坤母生我之意。奈何同胞。猶隔膜哉。或問道。則勸曰。好生。請益。勉之。曰。喜捨。句曲浣。

虛先生俞挹霖。聞而嘆曰。嗟乎。爲我而靳一毛。兼愛而棄頂踵。均有愧於沈老人也。甲子十一月朔。余與梅臣、及馮嶧陽、倪震菴、戴廷珍、約浣虛訪之。宿紫蓀樓。待浣虛未至。問其徒悉老人事。而老人不言也。

曹震亭長子綉君。十歲工詩。雍正己酉夏。隨父與叔宅英。及許毅堂。請余讀書棲霞山。繡君才十餘歲。登千佛嶺。撫六朝松笑而問曰。大夫竟爾多壽乎。何不厭人間也。幼嗜書。父母憂其體弱。常帷鐙默誦。己未夏。震亭客都門。舉家病十有七人。繡君手自煑湯藥。次第環視。忘寢食者數月。稍暇向佛龕稽顙。泣涕如雨。十七人皆愈。隣有孤客病。並時時往視。爲延醫亦愈。而繡君遂病。疾大漸。母病方起。泣而問之。迺伏枕叩首。泣而告曰。兒晝夜焚香禱天。請以身代祖母與吾母。幸得所請。母勿兒痛。兒無憾矣。遂舉手拭淚。瞠目視其母而歿。有夢其坐青獸。揮扇謝人而去者。性好施濟。恆輟己食。檢故衣與凍餓人。出游喜乘驢。憫

其蹇。每下而徒步。從者曰：錢所賃也。測然曰：是乃勞憊鞭撲無虛日者。幸值我。姑逸之。若不見其含淚而屈膝乎。世有苦而不能言者。多類是也。遺詩一卷。多入山脩道之語。遺孫二：長榜，字雁名。次枚，字卜歐。未弱冠爲名諸生。時藝時賦。冠於郡邑。

桃源薛懷。號小鳳。葦間居士邊髯之甥也。才氣清恬。詩詞書畫。皆酷似其舅。而鬚則童然不如。乃爲乞鬚詞以自禱。余因反其旨。轉其語爲免鬚詞。命小伶歌以賀之。葦間居士欣然而笑曰：是貶鬚也。將使涓陽成不毛之地乎。余謝曰：佞鬚惟我固善。至於鬚之軼倫而絕群者。殆將褒之矣。乞鬚詞云：松窻棘院消磨處。無端三十年虛度。七尺休誇二毛已賦。不道鬚偏遲暮。箋天乞與。從幾縷風前。代將吟塵。曲徑撚時。應添多少好詩句。于思不敢請耳。但臣之壯也。一婆堪懼。漫把菱花。寸田尺宅。盼斷渾無頭緒。山妻笑語。問於意云：何躁心如許。且製

羅囊異時留滿貯。免鬚詞云。青衫彩管風流處。幾曾三十年虛度。七尺堪誇。二毛雖賦。猶喜鬚偏遲暮。願天勿與。恐髯愧羣羊。尾慙仙塵。撚斷休煩。自添多少好詩句。于思徒取誚耳。有婆心一片。婆顏何懼。最厭蓬鬆。寸長尺短。欲理竟無頭緒。佳人笑語。免雙夢同時。刺人如許。省却羅囊。睡時難盡貯。髯仙程魚門見之歎曰。世無郭忠恕。誰肯薙鬚以效顰者。當爲吾鬚作解嘲。編以五色綜。妒殺薛郎可耳。程研民曰。余家有竹實山房。小鳳所來儀也。鳳比靈於龍。龍有髯。天奈何獨吝鳳哉。余亦鬚髯有鬚者。假鬚而可贈。余固不吝此於小鳳也。

三民者。山陽邊壽民。陸竹民。周白民也。白民博學強記。文義深醇。以六經爲根底。有摹其稿者。試必冠軍。多掇高魁。而白民老而不第。鬚髮蒼白。雙瞳紫光。築書爲城。糞字爲糧。壯心未降。人爲太息。乾隆丙辰舉鴻博。固辭。辛未舉明經。則又辭。論者惜其僑。竹民壽民曰。僑周郎者。非知我周郎者也。且爲我兩人煙水。

交耳。淮之城有渠貫其中。白民宅其西。每當風光月霽時。輒擎小舟。溯北關而東。過橋叩柳下板扉。呼竹民同舟。刺篙入蘆灣。行里許南轉。水澄碧而寬。有草亭。扁曰蓮葉仙舟。壽民畫蘆雁處也。土階積苔。座無俗客。壽民嘗謂客曰。俗蓋有二。粗俗可耐。文俗難忍。客曰。粗俗則易知矣。文亦有俗乎。壽民曰。姑舉其畧。古也而餽今也。而油贅言。若疣。套言。若毳。佯問。若搜。強辨。若眈。假視。側睥。假聽。點頭足恭。意偷首高。氣浮釣名。勝鈎刺利。勝矛步如曳牛。坐如鎖猴。言未既。客瞿然自顧而嘻曰。有是哉。文者殆難免乎。壽民自號葦間居士。性愛客。客至取畫易酒。舉箸無費。揮麈無忌。嘗告余曰。所沾者酒耳。所除者有四。梅有月則除。鶴。桃有雨則除。鶯。荷有風則除。鶯。蘆有雪則除。雁。竹民獨時時造之。竹民善息機。養和。逍遙觀化。以樂其志。虛中無競。榮辱毀譽。怡然若忘。接之者不復知人世。有炎涼態。朱石溪爲之語曰。富貴浮雲有陸君。大隱城市有邊子。冠冕南邦。

有周郎。三民者非凡民也。白雲教授曰。余作此記十餘年。已失其稿。乾隆戊子春正月。詩弟子張王齋得之。寄墨耕琴莊。刻入華陽散稿中。外有記甯溪。記訥齋二篇。竟無存者。甯溪歿已數十年。訥齋近八旬。隱於嘉山。不相見二十年矣。余將渡江南歸。約重會於鄭痴菴天花莊。與小掃花荆振翔。仿蘭亭脩禊事也。吾友石杉長老。號養閒子。與其徒素澗。避喧姑蘇何巖之東。靈津之北。治荒剔垢。載彈艱誠。乃爲鬪思晶舍。卽文震孟所題古法雲菴也。俗屐罕通。游鉢俱謝。爰有桂父、桐孫、石兄、蘭友、竹若、梅叟、柏稚、松雛。皆拱立環侍。清粹有儀。親如欲迎。謙如欲退。皎如欲顯。淡如欲隱。時或鵲語鴉默。蝸步蟻趨。鷺儉鷗廉。荷升蓼降。蛙忘怒而蟹忘躁。石杉則徘徊觀化。勞與緣息。悟與境生。其徒素澗。泊學者靜蓀。乃能偈外叅之。乾隆甲子秋季之望。余與毗陵高士巢訥齋。訪石杉於洗心橋畔。薛荔藏門。薜花沒徑。越宿請游天平道西津。訪詩隱朱適庭。過印心菴。

晤芝山禪士。遂登萬笏峯。望太湖。歷支硎。踰觀音崖。掉月東返。石杉嘆曰。像教其可悲矣。襲禪勦律。媚俗取悅。表芝紫而裏馬勃者。僧之鄉愿也。刹爲龍斷。經爲奇貨。口蓮菜而腹銅臭者。僧之販豎也。調銜僧腔。技誘佛戲。冷阿羅而熱傀儡者。僧之優童也。藉口吞鳩。反嘲戒殺。面蔬笋而背毛血者。僧之屠伯也。瞋則凶詛。歡成惡謔。貌苾芻而性荆棘者。僧之隸役也。陽託鐘魚。陰滋三毒。畫鸚鵡而夜鷓鴣者。僧之穿窬也。訥齋歎曰。是可砭僧疾矣。賦詩曰。雪嶠孤松不記齡。秋高鶴唳響滄溟。自甘僧衲探三藏。却笑儒冠蠹一經。錦綉不沉螻蟻夢。芝蘭堪洗鮑魚腥。詩人縱有青蓮筆。難寫諸天老謫星。石杉篤倫誼。尙清節。直諒多聞。儒者罕及。規過極嚴。而無損於恕。君子以爲可師也。天地不多雲外鶴。古今無數繭中蠶。此余題聞思菴詩也。甲子重午前。石杉自姑蘇歸金壇。與巢納齋數晤于朱元莫石芝樓。請與訥齋遊姑蘇。且避暑不果。



重九後。與訥齋從廣陵渡江。抵姑蘇。訪之。論及時僧。慨然太息。與朱適庭、僧靜菴、遊西山。未暢。其徒素洞與靜菴請徧游太湖諸山。以訪真隱。此意殊可褒也。石杉嘗對余稱學者。靜菴爲釋氏猗蘭。蓋爲王者香。非衆草伍。相見益信。導游天平支硎諸勝。雖登陟煩喘。而威儀詞采。溫粹不渝。訥齋與適庭賦詩萬笏峯。靜菴侍石杉。拱立縹緲臺。與秋霞俱澹。訥齋題石壁云。紫晚高秋景物澄。孤霞如鶴欲隨僧。蘇城十萬旃檀夢。淡到梅花味是冰。素洞爲石杉弟子。性清儉。能習苦行。不喜與浮惰往來。游士大夫間。意無諂競。亦不貢高真。可爲石杉後也。又有僧芝山。居太平山之印心菴。學於石杉。與靜菴善。游西山過其菴。有石爲霞。有池爲月。梅花十餘樹。天竹數百本。屏軒幽朗。有名人書畫。訥齋贈僧云。遠近秋山紫復青。尋詩先得小池亭。僧如海鶴情如菊。從此游仙夢不醒。適庭亦贈詩云。釣舟斜泊望嶙嶒。白菊花前禮佛經。山果正肥花自瘦。風標疑是六朝。

僧。又有鶴峯者。年少多能。篤厚恭敬。道俗悅之。石杉得意子弟也。居隆輿菴。遠未能至。以不得訥齋詩爲恨焉。

曉雲和尙辭充來蘇。秉律真諦。其致秋潔。其韻春和。望之如松栢。就之如芝蘭。環坐諸耆俊。鸞停鶴侍者。百有餘衆。皆足羽儀淨域。鳴瑞慈津。吾友石杉法師之高弟。號借菴者。敏洽多聞。能擇去就。以故低徊留之。與闍黎大盈成輔德也。乾隆甲子秋。與孟河巢訥齋。溯廣陵濤。浮棠湖。登蟒閣。晤凌靜圃。劉萊村。託憚寧溪。劉漪霞。重陽後南游抵平江。訪曉公於蓮涇丈室。訥齋贈詩云。采蓮涇上訪香盟。曲水長林景最清。夢斷茗和花有味。月高人與鶴無聲。西山雲就簷端宿。東海潮迎檻外生。莫道新詩堪漫贈。吾師原不重浮名。箕穎高踪嘆九孤。勞生多藉法筇扶。千山踏雪離東魯。一鏡披霞俯太湖。紫菊對君今夜靜。白蓮招我近時無。笑看渴鹿爭陽燄。塵暗姑蘇亞字圖。贈借菴詩云。海鷗何友鶴何師。

楓冷吳江未落時。却似菊花清不夢。對樓分月和新詩。親衣鉢者爲文水。中暘道瓏別菴。皆位聯清侍。韻院濁流。訥齋有詩云。闔西雛鳳謫來寒。還是明珠定玉盤。五十三叅猶記否。前身同作善財看。霜旣降。石杉請游天平。飲暘月坪。倚萬笏巖。臥蓮花洞。跨菡萏峯。而西濯纓趙凡夫飛魚湖。上雷崖。聽僧靜菴放千尺雪。探螺菴。還禮觀音臺。導游者朱適庭。餉遊者僧芝山。期或遇戒仙禪。俠。停屐齒而秉松肪。而未有如暘公者。其法侶如大中。智先。自省。天機。貫儒。守真。六如。可燈。諸德士。莫不凝脩。遭萍。志格人天。永照長老。息影忘言。默成贊化。暘公皆洽而安之。余題其屏曰。浮雲過眼古今速。皓月當胸朔望圓。蓋能得開山碧天律祖之心印者也。書之以爲暘公壽。

淮陰教授旣辭官。亨道人館之於珠湖柳衣園。園中有曲江樓。嘗携酒登樓飲。余曰。此吾祖二樵公。暨吾父大川公。與賢士大夫宴游處也。峙蝸角者。誣琴高。

赤鯉之肩。據蠅頭者。誕莊周大鵬之翼。吾不願子孫徒有富貴。習爲驕侈。願讀詩書。好善親賢。遠佞。弗委先澤於草莽。曠耆德之林。匿頑童之藪。爲君子鄙則幸矣。亨道人既下世。其子堯峯。磐邨。令利。昇白。重掃曲江樓。以延余。左有雲起閣。俯臨珠湖。東望雉堞。煙柳映之。湖北涯爲曹氏之廢墅。南爲晚甘園。導江先生以憩游士。又南爲鏡齋。隱君之白華溪曲。竹樹葱蘢。與柳衣園喬木數十株。隔溪交蔭。堯峯有詩以咏之。雲起閣之後。爲涵清軒。曹震亭聯云。好句似仙黃鳥地。澹交如水白鷗天。園三面環水。西爲民廛。其東偏乃堯峯之所分葺。補花增竹。扶石疏泉。不敢墜先澤也。乾隆癸未重陽後。宴賓於涵清軒。啓牖東向。天香吹岸。浮影搖屏。黃花頂鶴。唳數聲。紅葉坪鷗。藏幾點。蟋蟀之堂。有月。鷓鴣之艇。無風。一詩乍成。百牋迭和。儒不迂而吏不俗。僧可佛而道可仙。當園之未分。未葺也。余與亨道人飲曲江樓。堯峯賦詩。有墻頭籬菊亂開花之句。余爲惘然。

有句云。鵲巢生草鳩。初去蛛網沾。花燕不來天上彩。雲銷俠氣海西明。月隱仙才。題水南先生舊書樓云。金鋪赤縣恩難遍。石補青天志未成。賓客已忘新草莽。鬼神猶泣舊文章。余南歸蓋有日矣。姑記而存之。

乾隆辛酉重九日未曉。潤洲沙陷。人皆死於夢。浮沈如萍。前五夜漁者見黑衣吏。向江檢一黑籍。問之曰。殺報也。宜速好生。授黑籍于江而隱。沙客告余曰。居人好殺。產女多溺之。日捕螺。稚子學持刀剖蛙蚌者。父母獎其能。孔婺者戒殺。年七十猶鬻績放生。於姑勸慈。於媳勸孝。見人則諄諄曰。掃螺救蟻。俱是陰德。勿以善小而不爲也。衆皆怒。子死。一孫方齠。時忽瘡。携孫避瘡於尼菴。得免。是歲七月十九日。大風雨。海沸十餘州。皆沒。海陵有跛媳衛氏也。姑虐之。獨負姑走避水。水及其唇。捧姑於肩。倚槐飲浪而不仆。有榻浮至。乘之不死。媳方受笞。血痕在背。未平也。姑有三媳而寵其二。水至號二媳。皆不顧而升於垣。垣崩皆

溺死。姑病將死。持跛媳之手。告諸婦人曰。爲姑愼無有偏也。救我乃跛媳乎。爲姑愼無過虐也。

辛酉冬十月八日。可詩山人曹浣香。石芝羽士朱元裳。訪余洮湖之上。迎于野。握余手笑曰。效龐公平。何蹊然避城市也。以舴艋迎君。余告曰。有瘠田三畝。苦潦。晚秣未登。頃者正操鎌耳。至庭。仰而嘆曰。漏。俯而嘆曰。濕。食菘麵。留詩于瓜渚草堂而去。越二日入城。適浣香遊西山。余宿石芝房。將訪玉勾詞客於錫山。逆旅。夜飲而悲。元裳撫几曰。泔泔乎。生何勞也。原者夏苦於旱。隰者秋苦於潦。富益吝而貧益貪。吝可言也。貪不可訓也。余聞曰。市今曷貴賤乎。曰。金賤耳。薪之腐。菜之蠹。貴數倍焉。泥以金弗顧而去。夜將半。燹茗。元裳喟然曰。稻之秉莽。煌也。岱輿山有莽。煌之草。佩之可以不衣。稻之秉貴如是也。索之弗獲。追之弗及。嗟乎。寧寒於體。無寒於義。甯餒乎身。無餒乎仁。惡不可爲。善尤不可爲也。余

悚然問之。曰郭東有老農。花逢源者。敗縑茹草。節儉而好施。有穀數十斛。以贍饑者。衆皆搖尾而睨之。弗繼。遂桀毛而吠之。善可爲乎。浣香留瓜渚草堂詩云。獨樹山家黃葉飛。鳥啼盤野色恒饑。故人鷄黍何須供。麥飯三升老布衣。黃花紅蓼水生香。碌礪村邊未滌塲。吟過小橋題寺壁。竹搖詩上動斜陽。元莫詩云。湖上西風漿欲飛。暮山如畫可妄饑。漁樵不倦詩人健。自織棕衣笑錦衣。滿匙銀線菜根香。曬穀初晴掃鹿塲。十月黃花霜未降。登高重作小重陽。

乾隆六年十月十三夜。別元莫子。登舟指月。未曉叩蒼如上人琴溪禪院。既爾訪謝筠園。謝蒼培符書玉。會小掃花荆振翔于東灣宿焉。奔牛鎮有神祠。銀杏四株。隅立交柯。圍可二十步。垂瘳長數尺。若怪物。鱗鬣牙吻。質如鏐。根有穴。雨久則見丹螺。蕭梁時避兵者。上隱千人。大已如此。其神爲五行之司。靈爽特着。雍正庚戌十月。夢神屬余題其楹。甲寅二月。又題之。禮神時。長檣忽仆壓左。

肩。輕猶片席耳。及舁之弗能舉。蒼公性亢直。忍辱能容人。率衆力田。有傭者盜米粟。沙彌發之。蒼公令置原處。曰細過耳。升斗輕而名節重。發之敗其名。傭將弗售。傭聞愧悔。蒼公慰之曰。汝以母老飢寒故耳。此孝也。雍正十二年八月。鹽城李書生。歲荒率家屬將就食廣德。絕糧舟不能進。其母年七十餘。飲水療飢。二日矣。無可告者。蒼公與其徒蕙宗。贈之米。慮不足。益麩麵。且給以薪。蕙宗曰。須白老和尚。蒼公曰。白之將沮。夫爲惡于隱者。罪更浮於顯。爲善於私者。理無害於公。今者不告而與。正以成吾師之善。而不傷其意耳。震林聞而記之。蓋舉釋以勸儒也。

風雨誤元夕。忽又日之五。連街屐齒鳴。泥滑罷鉦鼓。嬾叟掩窻臥。如晦不知爾。夢堆三丈雪。愬盡梅花苦。枳園積詩逋。迺在病中補。素心霽爲月。不受陰霾蠱。七言當六博。硬與唐宋賭。毛錐穿混沌。奚論白與甫。孔方寡兄弟。聊復士而買。



重戴還山笠。更買過江櫓。君去我不孤。未免鬱心腑。世味各有好。酸鹹別醃鹵。口福稱所修。厚薄異蔬脯。長齋皈綉佛。求慧轉愚魯。擬看黃山松。雖老力當努。憑君爲沽酒。醉挈神猿舞。吾友有幹屏。高隱並巢文。震亭官情息。歸作猗蘭伍。方翁號自然。遠接宣平武。我欲從之游。御風縱雙股。忘魚既有鶴。忘肉復有虎。勉旃問可師。拾薪爲供釜。惟君志忠孝。還得附仙譜。

乾隆丙戌上元後。詩弟子吳枳園。將自揚歸歛。偶感微疾。枕上賦名懷詩。清遠絕俗。兼和余近作十餘首。益峭而新。去秋以此冊請余寫山水。以代小照。置案上。未暇也。迺今爲五言古書之。以贈其行。索墨耕琴莊。暨恂夫。陶邨。睢園。講梅。菊臺。珍蹊。斐園。次韻。并携此冊歸游黃山。請老友震亭。與幹屏和之。並託訪自然先生。候蝴蝶清安。述螻蛄近况。一今似電。三古如雲。塵海昏濛。不知幾人能佛。幾人能仙。認覺爲道。認道爲覺。吾恐人間一墮千劫。猶愛梅花未歸者。翻使

梅花笑人寂寂也。余有詩寄自然先生云。華陽古洞白雲班。滿經荒茅塞未刪。螻蟻千年沉一夢。蜉蝣萬里望三山。鑿開混沌難逃劫。修到神仙不忍間。顧與先生同救苦。迨今須破藥囊慳。又有贈饒仙詩二首。並托呈先生一粲。津間桃源路轉差。酒香肉美厭胡麻。饒仙煮鶴甯思跨。廉士吞鵝不肯哇。笑我一盤黃野菜。輸他三斗赤靈砂。殺生果是長生訣。請學庖丁拜易牙。修得饒仙大喜歡。苦將物命勸加餐。魚蝦直欲連頭嚼。蟲蟻何勞舉步看。羶霧鎖天登可易。腥風刮地縮應難。梅花冷向鑪邊笑。不煉真丹煉假丹。白雲教授長齋數十年矣。有饒仙來訪。壽踰百歲。顏類十齡。非酒不歡。非肉不飽。茹蔬三日。出涕流涎。勸我破齋。傳我真訣。敬謝不敏。賦詩贈之。余聞自然先生乃長齋戒殺者。當不以余言爲唐突饒仙也。願先生爲衆生請命於羣仙之嗜肉者可乎。

詩貴無礙。不論理。理無礙也。不拘事。事無礙也。詩貴無相。情中景。景無相也。景

中情。情無相也。詩貫無漏。情外情。情無漏也。景外景。景無漏也。化凡爲仙者神。不若化仙爲凡者之更神也。得意忘言者妙。不若得言忘意者之尤妙也。詩有補天之術。煉五色於掌上。詩有縮地之方。聚千里於目前。驕則鳳凰不如我。窘則得過且過。詩之號寒蟲也。光則可照大千。神則能雨衆寶。詩之牟尼珠也。黃海徐墨耕。琴莊托曹震亭。致簡邀余。來竹西吟社。如方密庵之淳博。曹菊臺尋蹊珍溪之靈輿。江恂夫之恬遠。吳積園之清逸。以及鄭荔莊程端笠之飄然不群。皆所謂金粟後身耳。墨耕琴莊師之若鸞鳳。友之如芝蘭。非荆棘在腹。芒刺在背。雌黃在口。黑青在眼者之所能伍。故其爲詩。契溫厚和平之旨。襲興觀羣怨之遺。諸君子咸歎而美之。於是知芥子可大。須彌可小。祝融可寒。元冥可煖。地包人外。天包地外。而包乎天之外者。則吾之心也。星者日之所生。月者日之所燦。而所以生月燦日者。則天地之心。卽吾之心也。瞶者以爲無雷霆。盲者以

爲無日月。何是以語此哉。詩者時也。時者心也。心者無相無礙無漏者也。遊天平山之明日。別石杉長老。同巢納齋。造蓮涇寺。宿詩僧借菴之北樓。納齋賦西山詩。嘆曰。此游得毀霞村。曹震亭。趙闇叔詩。須壓倒謝眺驚人句也。余曰。震亭隱黃山不可見。霞村與王淡園。張石鄰。朱元莫。俱老而倦詩。曹浣香。于西華。喜詩好靜。闇叔輟詩著形家言。目無虛顧。足無虛步。卽爲詩亦成憾。龍經矣。與訥齋止北樓。旬有五日。晝苦筆墨。晚或野步。商飈漸厲。霜月可悲。憶友懷鄉。雜感遙赴。乃爲菊花吟五章。曰。遠峰幾點太湖寬。題遍吳綾筆未乾。夜半石樓霜似雪。倚欄人念菊花寒。天涯相並似棲鴉。月冷吳江夢到家。閒過重陽未憔悴。菊花應爲待梅花。澹霞殘照問蘇臺。草草東游第二回。遍地淵明惟愛酒。菊花如夢虎邱開。虎溪霜降斂潮痕。黃蘗初堆野寺門。試與牡丹論品級。幾人知道菊花尊。扁舟如繭客如蠶。揚子江頭北復南。乍雨乍霜禁不得。此心唯是菊。

花甘。又爲芙蓉吟五章曰。黃花紅葉送秋時。燕子先歸總不知。誰信吳宮舊明月。芙蓉心痛似西施。水雲淒淡到初冬。避盡春來蝶與蜂。最是花神不安處。海棠無福見芙蓉。幾度將歸更遠游。闔閭城外倚僧樓。小春小雪吳江夜。幸是芙蓉不會愁。相依猶藉菊花遲。但諱無情豈諱痴。宋玉遇秋悲未盡。白芙蓉伴黑鷓鴣。漸多衰草怨王孫。却喜晴光早晚溫。莫道葵花能向日。芙蓉原自感天恩。貞仙蔡氏父無子。自教之讀書。每日請其父說忠孝節義事。有奸邪負心者。則嘆曰。爲人乃如是耶。既退。必焚香拜天。自幸得忠孝節義人。字於同邑之于氏。年十九將嫁。夫大病。卜者曰。迎婦則吉。時父方歿。母難之。貞仙請于母曰。往而吉。違之不仁。且無義也。母然之。遂往。夫死。分所簪如意釵。簪其一于夫首。脫一釧。納夫之腕。哭而絕。復蘇。初聘時。夢金釧入手。斷爲草質。取銀釧。復斷如初。珠翠皆成紙花。有吟云。草草絃中曲。忙來半局棋。至是驗云。及殮。截髮納棺。縊于

柩旁救之不死。旋墮樓弗克。夢其父示以節孝二字。曰：宜兩全。於是和顏事舅姑。時姑尙未舉次子。乘其喜。常爲說古今賢婦人爲夫廣姬妾獲福報者。姑從之。且使主家事。忌者譖之。貞仙辭于姑曰：媳不才。家事弗能理也。忌者又譖之。謂其有他志。貞仙乃泣曰：節孝寧復能兩全耶。於是夜取所讀書。并自書手迹。與所作詩詞。泣而焚之。啟匣檢所存如意簪手釧各一。泣玩良久。戴而復脫者三。嗚咽俯仰。悲不自勝。促老嫗先寢。更衣對鏡。撩髮取素繩纏如意簪于髻。甚固。抹釧歔歔。顧女婢曰：以託汝。倘死勿爲人所脫也。且起襲故衣。問安于姑所。辭色和婉如平時。爾侍食既撤。入房而縊。時乾隆丁巳六月五日也。年二十有五。貞仙父字斗南。其叔字秋巖。余友也。秋巖館句曲。每歸必視之。問曰：聞舅姑以譖常挫汝。有之乎。對曰：否。天下無不是底父母。古賢婦有訟其舅姑者乎。卽死切勿有他言也。

壽侯公諱長祉。自號重遠。武進人。吾友憚甯溪之祖父也。父定伯。舉五子。公長。弱冠以家累棄書。有誤舉子業者。叅以言。晒曰。爾何知。遂發憤。折節讀書。爲人訓童子。五官並用。期年而學進。成文章。歲試得首拔。爲郡諸生。晒之者悔之。性孝友。慷慨尙氣誼。弟哲。有狂疾。數侮公。踞公臥榻。溺于食器。且焚屋。公弗嗔。哲袴單。脫已袴與之。曰。吾弟寒。易斗粟。分數升與之。曰。吾弟飢。孫讀書。則教其姪。曰。吾弟亦望兒讀書也。妹貧。給以麵。暑夜自驅牛磨之。婦執篲。苦蚊。無怨也。邑人高方芝。以訴荒忤縣令。吏捕急。方芝匿。逮其母。公謁令曰。方芝孝。當自出耳。已而果出。方芝死于徙。妻殉之。皆藁葬。公跋涉千餘里。加土立石。書曰。武進義俠高方芝。同妻貞烈宣氏之墓。設奠哭盡哀。翁是時年已六十矣。丹陽有婿劫婦翁者。其從十餘人。武進窮民也。乞公救。公曰。律法親屬相盜。減等。投到得免死。願投到乎。皆曰。諾。公率之。投本邑殷令。殷嗜詩酒。疎吏事。大愴曰。民窮吾罪。

也。卽投到庸免乎。逸耳。衆皆逸。上官怒。置公于法。盜聞之。皆復來。擬大辟。公坐縱盜律。擬徙。仰天而嘆曰。嗟乎。上帝好生。聖主好生。上官者。體好生以救民者也。潤城守陳公。反復引律例。以去就爭上官。得援投到例。釋不坐。凡五年。鬚髮盡白。病肝數暴怒。二年而卒。卒時。索筆寫數字不成。日方午。命燭。甯溪跪泣曰。公意教子孫孝友。凡事須重義。勿辱先云耳。首連肯。指心曰。無愧。公課徒善誨。勉人曰。上備四金耳。吾輩安坐倍之。無功。主子孫不識字報。又曰。吾幼失學。然善味孔孟語。每以一兩字成事業焉。平居木訥。事有不平。則履大庭。折豪貴。辭氣侃侃。嚴不傷和。怒者霽顏。辨者咋舌也。謙厚廉介。有勞不伐。或酬之。却曰。利爲義乎。卽怨公者。無不心服云。

古歙竹溪曹隱君。松癡老人之子。吾友震亭之父也。松癡老人年五十無子。禱於白嶽眞武廟。乃生隱君。性至孝。父好施。奉金於篋。施將盡。輒潛益之。嘗築室



以養父。慮厭土木。乃託親友。邀父看松於黃山。踰月歸。而軒閣新矣。剛正寬厚。智略過人。慷慨有俠烈風。敬師友。恤親族。行路有急。計之必周。赤手屢致萬金。揮散中落。浩然自得。教震亭曰。同急而僅以塞目前之責。是煦煦者。非仁也。與朋友交。吝於責善。而獨爲君子。是子子者。非義也。爲師而嗇於口。居官而濫於手。衡文而昧於目。是敗名以辱親。非孝也。震亭在京師。隱君寄飯甑。歛。勉以先憂後樂。宜隨分隨力。時切此志。一日渡江。舟遇風。幾覆。隱君危坐益恭。謂舟人曰。管甯渡江。以一日科頭三晨晏起爲過。吾之過多矣。俄有神鴉集帆。帆落而舟定。遇異人授以方書。能起危疾。暮年息游施藥。園中有梅數十本。日以詩詞課兒孫。書學南宮。詩愛香山。詞中稼軒。好陸宣公集。皇極經世。楞嚴諸書。嘗閱余筆記。謂震亭曰。此誘人爲善之書。易簣時。命震亭母作行述。得漁樵輩合傳足矣。

朱適庭、讀書詠詩於何山孝隱峰之麓。翛然與流俗相遠。吾友石杉長老、性高潔。寡合。避喧。何山之聞思菴。蘇人憚其峻。多避之。惟適庭來甚洽。每造菴。輒取僻經。或獨行曠野。集漁樵爲歌吟。遇機辨則以爲不幸。遇驕貴則以爲不祥。客誠適庭曰。何乃爾爲。適庭曰。世俗好規而惡矩。諛紫而謗朱。從之是戾性也。目不可以受芒耳。不可以納糠。舌不可以習簧。額不可以就禮。卽且以多足行。郭索以無腸生。造物使獨非力所成。客曰。子于交何善。適亭曰。嗟乎。與魚善而獺忌之。與鳥善而鶴嫉之。子不見夫敏虫與譎豸乎。爲蛄。爲螭。爲桑扈。爲蜻蛚。爲烏賊。爲劬撥。爲顛當。爲奔鱗。爲負蠖。爲虹螿。爲濡需。此皆才智多能。秉持相勝。吾所惶汗驚惻。弗獲傳其心。竟其術者也。客前席而請曰。何謂適庭曰。蛄螭盜米。餒是用慰。桑扈竊脂。瘠是用肥。蜻蛚轉丸。雖穢足歡。烏賊吐墨。設詭謀。脫劬撥。媚竈借煖。自犒顛當。守問防寇。自存奔鱗。助懶灼肪。自斬負蠖。導吝多積。自隕。

蚶蟻蝥胃。日月是味。濡需附鬣。湯火將及。抑更有慙焉。爲蟲而善叩頭。爲鳥而忍批頰。石杉長老聞之。岌岌然而笑。適庭忽謂石杉曰。爲饕餮者之口。其亦幸矣。而未嘗虛之也。爲僂僂者之腰。其不幸矣。而未嘗直之也。手莫賤於賭。膝莫輕於詔。腸莫曲於利。奴足莫捷於名。僕石杉長老。又岌岌然笑之。

乾隆辛酉科。李生應舉不第。與其友王生。叩于華陽睡和尚。和尚不知何方來。與之語。輒睡。言人功過皆中。而旬月閉目。問之。勿言。無人或自言曰。可憐可憐。兩生素負才。屢擯將老。登茅山大哭。跪和尙前。乞一言而後起。和尙徐顧李生曰。子之婦三溺女。而弗禁。壽且大折。得男亦殘廢不才。念富貴乎。謂王生曰。子刻于財。冒于色者也。生自陳無過。和尙曰。貸金於人。息乃加五。生曰。否也。和尙曰。貧者遲償。併息于本。歲兩易券。應乎。王生自謂未嘗犯淫。曰。甯必身犯哉。窺之目淫也。戲之口淫也。詠之筆淫也。夢之夢淫也。思之意淫也。和尙閉目不復。

言有蔣生失館而餓。叩和尚。和尚作呼犬聲。蔣愧悟。拜而去。蔣于館食肉有皮。輒呼犬擲之。

湖西放生菴。明季僧悲願所築也。菴殘毀數十年。僧無至者。一僧忽至。席黃茅。枕一草屨而睡。或曰華陽睡和尚也。焚臺馮處士觀之。著單破衲。露左肩。跣足。一草屨在旁。內藉蘆花。處士供以蔬笋。有問者。則跌坐閉目。應之。王家婦既嫁而瘖。舉止狂亂。十餘年不治。夫挈之叩和尚。和尚曰。字紙襯鞋底可乎。遂爲衆人曰。窻眼牆罅中有塞廢字紙者。宜速焚之。勿狼藉入穢處。受惡報也。莊姓者富而忽貧。凍餒意欲自盡。和尚曰。以朽米飼猪。而飢者弗施半勺。以故綿藉犬而寒者弗捨寸絲。雖死無善趣耳。鄰邑馬生。課徒菴北。性褊躁。善侮謗師友。向和尚誦昌黎佛骨表以譏之。和尚曰。口銳者天鈍之。目空者鬼障之。馮處士乃從容問和尚曰。如何是空。應曰。上不怨天。下不尤人。如何是戒。己所不欲。勿施

於人。如何是悟。見利思義。見色思禮。如何是清淨。諸惡莫作。衆善奉行。越數日。謂處士曰。吾欲往陽羨山中。訪如是僧。君從我。遂南至陽羨山。見如是僧。僧不識字。聞金剛經六如偈。悟曰。足了吾大事矣。因號如是僧。和尚命僧煑茗候客。忽山主徐某來。聞和尚神異。叩之。和尚方熟睡。夢護曰。香兒可憐。可憐。香兒徐之寵童也。徐立遣之。和尚乃別馮處士曰。吾暫往銅官第五峰。遂去。

蟻擾揚州。熱可憐。秋雲峰冷白於綿。滿杯月色游龍筆。兩袖荷香放鶴船。此會偶來經浹歲。相逢休閒是何年。西風杜若洲邊宅。更憶君家季弟賢。此白雲教授竹西送震亭老友歸黃山。兼懷若洲詩也。若洲長子鼎。爲余詩弟子。篤孝義。有雋才。客於竹西徐氏之學圃山莊。墨耕琴莊。昆仲皆敬之。恒歎其父德未彰。而遇多蹇。以未能入余散記爲恨。余謂之曰。子略陳之。我姑筆之。將與墨耕琴莊泛黃海。陟天都。約隱君訪宣平丹竈。採薪沽酒爲汗漫游。誠快事也。若洲父

竹溪公年六旬。舉家累委若洲。卽罄所蓄上之。皆歲時所受賜於父者。一錢尺帛。遂不入私。宗黨稱其孝義。練達果敢能任事。不以利鈍爲趨避。嘗治鹽務於建昌。地與閩接。多私梟。有老僧顧而戒曰。子有奇厄。靜以待。乃可免。時立注巖。私梟鼓衆。持白挺。突至寓。當之者破額折脛。若洲退坐小室。挺擊者若不見而去。山東飢。開捐助賑。若洲爲友人往納粟。橐數千金。從一僕。刦奪載途而卒。無失抵東省。見獲一盜。卽前之車夫也。驚詢之。固盜也。以待之厚。不貽發耳。經營於廣陵。致萬金。凡親族窮乏者。投必留之。分任以事。屢爲所負而不悔。惻然曰。千里投我。拒之。或不能自全。則是我致之也。後買蘆場於湖口。水火交厄。虧折殆盡。其子鼎借千金助之。復盡。乃歎曰。時命如此。吾將隱矣。遂隱於鄉塾。以詩書山水爲娛老計。兄震亭嘉其息機順命。可進於古昔隱君子也。

放翁詩云。家如梁上燕。歲歲旋作巢。身如林下僧。處處常寄包。白雲教授。乃拙

於營巢。嬾於打包。是燕而忘巢。僧而忘包者也。菊臺詞客才通運塞。曾作聽之圖。屬題。則是燕而聽之。春秋。僧而聽之。夏臘者也。壬午三月上巳。墨耕琴莊。具季。招白雲教授。會震亭詩隱於學圃山莊。諸君子皆有圖。墨耕之觀海遠矣。琴莊之弄月高矣。厚菴之相馬深矣。滋堂之聽松逸矣。拙齋之看楓韻矣。協庭藥亭之乘釣靜矣。講梅之躬耕樂矣。恂夫之風木悲矣。震亭與白雲教授。及尋蹊皆有詩補之。當是時。燕口之泥。半夾落花。僧手之鉢。滿盛月明者也。當是時。又未知世間世外。燕思諂鳳。而鳳不提携。僧思佞俗。而俗無接引。更非算數譬喻之所能及者也。白雲宦游淮甸。與敦仁樂善者。結同心之社。應庚癸之呼。則又燕忘其拙。而代燕營巢。僧忘其嬾。而代僧理包者也。諸君子勉之。附錄游僊詩九首。扶桑東畔訪同心。月爲徘徊不肯沉。花散海西歸去曉。天風吹冷辟寒簪。八瓊靈曲萬年歡。鳳子生孫尙未冠。合取妙香成世界。碧雲無級有闌干。海棠

無恙水仙存。重雨輕雲總是恩。且放蟾蜍光一半。與他蝴蝶破黃昏。手題香簡  
寄蓬萊。新種紅梅近可開。弱水到今如有力。好浮花片海西來。鶴半春寒鳳半  
飢。東風消息奈何稀。封姨只道嫦娥富。又向錢神典羽衣。冷仙花裏拉寒儒。一  
局揪捋兩不輸。夜對明珠修謝表。喜聞王母赦花租。佛函仙笈記曾談。大地如  
球繞看三。天外有天君到否。梅花都不異江南。曉寒吹上衍波箋。夢裏詩情最  
惘然。修得花神乘月姊。人間多住幾千年。洞天絲管退仙班。靈鳥將雛倦亦還。  
一朵白雲休北斗。無心還憶舊青山。壬子閏五月既望。曉村曹耕遠。送菊臺。尋  
蹊。恂夫。枳園。與墨耕。琴莊。書並詩。於淮陰聞思僧舍。喜滋堂。密菴。竹莊。西野。暨  
德辛。閔隱君。筠谷。老友。悉無恙。白雲教授以微疴留淮。遂爽墨耕琴莊閏重五  
之約。雨窗獨坐。題琴莊册既畢。適得篋中故册。復書以寄墨耕。流颺扶雨。拂研  
點衣。墨淡如烟。筆欹似溜。殊不及放翁詩。未遽衰。猶跌宕。書雖小退。亦軒昂之。



語也。

棠仙謝氏。父恆。母馮。皆好善。棠仙生有慈性。匍匐時。知讓蟲。初學語。教以念佛。復于口不已。學行遇蟲。蠅合掌。喃喃遠避之。年及笄。骨相神彩。麗如刻畫。嘗蚤起。觀海棠。嘆息。取露中花。戲貼於靨。望之若無。母笑曰。此吾家海棠仙子也。因字爲棠仙。棠仙益好善。戒殺。愈自珍愛。志異。凡女子。鄰女相聚。私論曰。得婿而富幸也。或曰。須貴。或曰。期美。棠仙方綉鶴。不語。針疾如電。鄰女問之。乃曰。姊所言皆其下耳。玉體無瑕。竟委之地上。人奈何。有從天上來。貧賤醜老。心所甘也。從容問其父曰。世間共有幾許字。父漫應曰。五萬。秀才識字能幾何。漫曰。五千。笑曰。何貧也。試以教兒。父於是日取字教之。能記字萬餘。而字義悉解。年十八。父歿。有蔣嫗者。以佛事召其母爲媒。曰。尹家兒富而甚俊。何如。母信諾之。既受聘。乃繼室也。爾且貧。母大忿。痛哭散髮。持刀欲自刎。蔣嫗棠仙哭而勸曰。

天所命也。兒無怨也。母素憐棠仙志。今誤之。慮其悲憤死。然徐察其意。無幾微慍者。則又慟曰。豈天命哉。汝母急。竟誤兒矣。嫁數夕。棠仙自剪燭。請於其夫。聞亡姊有遺兒安在。夫曰在竈。兒失母。黃瘠如人臘。棠仙抱之泣。期年生子。慰遺兒曰。古語云。有弟而兄啼。吾不然也。每飲必教己子曰。先敬兒也。每食必戒曰。無與兄爭也。遺兒病。則盡夜坐帷中。減食色憂。愈乃喜。歲祭必親拜遺兒母而視曰。姊勿以兒爲痛也。姊之靈時察棠仙。慈於己子。忍於遺子。殛棠仙可也。一日祭焚楮。火忽嘯。呖呖然灰旋及棟。撲棠仙。棠仙暈。聞顛媛能視鬼。召之。遺兒母憑顛媛告棠仙曰。司命以妹好生。列名仙冊。送華陽易仙宮。有烏衣婦來訴曰。謝棠仙手三刃。余慘痛。昨焚楮時。烏衣婦突至。吾禦之耳。明日遂瘳。蓋父歿時念鷄羹。而棠仙代庖也。辛酉秋。震林見馮母。問棠仙安否。猶悔而泣焉。言其事如此。其夫名載福。樸魯治田。長棠仙十餘歲云。棠仙好潔。拮据育二子。身自

執纓。衣裙楚楚。無有塵氣。而色亦不衰。髯叟新安人。未冠生髯。旦起必視於鏡。曰。無蟹而鉗我髯。是瞻無燕而尾我髯。是喜。視三年。乃大豐。邑人稱之曰髯君。漸老。改稱曰髯叟。口直好面。規人。少年稍淫佚者。必痛斥。皆俯聽。莫敢仰視。士大夫遇髯叟如嚴師。大敬畏之。商於蘇。將歸新安。同歸者十餘。各相戒。避髯叟。登舟則鬢然先踞舟中矣。少年皆失色。欲引去。叟呵之。既無奈。遂發。舟人女名蘭年。頗艷。黃生鳴臯者。居內艙。近之。髯叟數顧而戒曰。少年毋自輕也。黃生憚。讓髯叟。叟掀髯應曰。可。明日叟大病。蒙被。忌日月光。夜忌燭。諸生悉危坐無譁。意殊怏怏。病十日。舟抵新安。逮夜。隔巾擁髯。顛而登輿。先是叟遊西湖。逢卜者。使之卜髯。其象曰。髯舉。舉于有女。髯栩。栩前有羽。叟以爲告也。既登輿。黃生責舟人曰。若不謹。以風露中老人耳。蘭年曰。吾有藥可治之。以巾裹物。擲黃生。啟視則髯叟髯也。色頰白。桀桀然。尺有咫。

焉。衆測其故。莫不嘆蘭年貞且慧。云悟岡退士聞之曰。象有齒以焚其身。賄也。叟有髯以病其身。僞也。祝於幼年。衛於暮年。矜於少年。而贈年蘭年。惜乎異哉。元夜月滿地。有雪天無雲。訪聚用長老。於淮陰聞思寺。問佛與法。聚公曰。何者是佛。何者是法。旃檀貝葉皆非也。何者非佛。何者非法耳。鳴目皆皆是也。執像求佛。執經求法。劫火洞燒。經像俱泯。二者何在。在在皆在。而人不悟也。余曰。佛法如是。士農工商。信者無幾。奈何。聚公曰。士期於學文。無文之文。乃爲至文。不悟者愚矣。農期於力田。無田之田。乃爲福田。不悟者荒矣。工期於能巧。無巧之巧。衆巧所師。不悟者拙矣。商期於獲利。無利之利。萬利所歸。不悟者窘矣。一字必惜。是大慧佛。一粒必珍。是多寶佛。一蟲必救。是長壽佛。而人不悟也。一字萬化。無量法王。一粒萬種。無量法寶。一蟲萬命。無量法母。而人更不悟也。余問人有三難。人身難得。中土難生。正法難聞。奈何。聚公曰。卽非人身。無非佛身。卽非

中土無非佛土。卽非正法。無非佛法。悟者何難。又問佛有三難。衆生難度。無緣難化。定業難逃。奈何。聚公曰。衆本非衆。生在慈悲。無本非無。緣在喜舍。定本無定。業在懺悔。悟者何難。又問父母未生我前。我在何處。聚公曰。且道父母旣生我後。我在何處。問何如是。祖師西來意。聚公曰。不師師。不西西。不來來。且道且道。余遂默然。聚公說偈曰。今年元夜却無雲。春雪三分月十分。大地清涼除熱惱。梅花忘我我忘君。甲戌春。聚公與其徒養淳。蘊哲。徒步朝清涼山。山志藏板。適燬於火。乃取舊志歸淮陰。重校而梓之。請序於余。因述問答之語。可悟聚公以大千爲山。以大藏爲志。無在非清涼者。

客謂浣虛子曰。使廉而能。蚓則將安槁壤。慮蛙黽。不復拉蛄強。匍匐而訪六熬矣。使清而能。蟬則將甘濃露。畏螳螂。不復凌女牀。忸怩而謁九苞矣。蟋蟀善吟。以友於大鵬。蝸牛善篆。以客於長鯨。乾蟋蟀之舌。涸蝸牛之沫。彼莊生夢中之

蝶。方栩栩然謂其餒也。余送郭孝廉起東詩云。早雁初霞雨後峯。漁樵心迹頗從容。與君生在山青處。詩裡相思畫裡逢。偶然空谷得知音。一卷西青海外心。貧到蓬萊君信否。神仙無藥點黃金。中秋前一日。與夢蘭蔭穀訪倪震菴於西陵。震菴之父玉山先生。拙於宦。貧不能具帷衾。震菴喜學仙。浣虛子進之以禪步山中。入古廟。見白鬚翁。問其年。七十有三。嘉定李南溟也。閱其詩。多壯年遊長安爲贈答者。自言躍馬食肉。與王公相揖讓。賓師於當道之門。幾三十年。其門人頗有仕者。年既老。窮而喪其子。來句曲。依於其甥。甥不能自食。乃依僧。僧厭之。自煩以食。課三童。得二金。性嗜酒。忍飢謀醉。不以食易飲也。衣皆故紈綺。敗簾無鏹。偷兒月三竊之。裸吟自豪。目光炯炯。對泥神。朗吟杜陵句云。北里富薰天。高樓夜吹笛。焉知南陵客。九月猶絺綌。十年前已窮而滯於此。乃今復來。少措金置薄棺。期於古廟中作壽寢矣。浣虛子數餽以米。一敝裘典爲飲。夢蘭

贖而衣之。夢蘭慨然曰。雀爲蛤。雉爲蜃。升沉未可定也。腐草爲螢。朽穀爲蛾。顯晦未可測也。倪震菴而太息。案上有落水詩八首。屬蔭穀抄之。以載於集。唐璜劉祖瞻。性行篤實。精舉業。浣虛夢蘭。延爲子師。得青烏秘書。不以逢世。三訪余於如意岡。乾隆八年癸亥八月。將晦。故人孫文廣。招遊浮山。夢蘭祖瞻相送。由方山踰朱曹巖而西。別於紅葉之林。過蔡巷。訪倪叙五。同訪戴巷。誇北文於浮山之北。北文二歲卽孤。業師戴某。誘其產而據之。戴卒無後。北文發憤讀書。爲名諸生。著地理纂要書。斥形家之謬。爲長短歌行十餘篇。以警世。蓋與孫文廣。皆隱君子也。九月朔。與北文登眺於柏陵之上。余曰。里之屋其潤矣。誰歟。爲善者。北文倚栢而嘆曰。是固逐末之藪耳。諺曰。賈有錢。薄聖賢。商有田。鄙神仙。賈日以驕。商日以詐。富日以刻。彼方且慢士而輕農。侮仁而毀義。夫何善之能爲。余曰。君子則宜誠之矣。北文曰。何益。賈云。而衆稟也。士云。而衆晒也。商云。

而衆和也。農云而衆唾也。飢而諫飽。彼以爲將丐其餘。泔凍而諫煖。彼以爲將貸其敗縵。又何誠之能施。雖然。殘於物者自殘也。刻於人者自刻也。彼之術巧。鬼之術亦非甚拙。彼之炤長。鬼之炤亦非甚短。以術窮術。以炤撲炤。而彼奚遁。遁於身而子窮。遁於子而孫窮。不爲鬼笑者罕矣。富者爲蠶。貧者爲葉。而未幾繭矣。而未幾蛹矣。未幾而繅之者至矣。吾悲夫人繭而鬼繅者也。北文甚貧。課童子自食。留余數宿。晤許資生以甯蒸表資生乞題其堂。堂聯求多字。遂爲多字聯以勉之。

十月旣望。欲雨而霽。小掃花荆振翔。鼓琴于琴溪之梧月樓。爲陽關之操。曲終倚梧仰月。憮然嘆曰。惜哉。最可惜者夢也。夢中景恆秋。夢中人恆雜。夢中事恆苦。夢中意恆悲。斷而續之難。缺而補之難。人之夢而我不見。我之夢而人不諒。月之明。雨之晦。萬夢交雜於人間。月非月。雨非雨也。人生數十年而夜廢其半。



夜數十年而寢廢其半。寢數十年而無夢廢其半。有夢數十年而惡夢廢其半。佳夢數十年而忘夢廢其半。天可以晝而不夜。而與人以夜。惜其晝之無暇也。夜可以不夢。而與人以夢。惜其夜之無用也。夢不可以覺。而與人以覺。惜其夢之不知也。天惜人無感慨。不得已而以夢生之。奈之何猶無感慨也。天惜人有感慨。不得已而以夢慰之。奈之何竟無夢也。夢中秋。秋勝春。夢中離。離勝合。夢中苦。苦勝甘。夢中悲。悲勝歡也。

翁姓石、洮湖人也。王鈞、鰈。冬夜披簑坐洮湖之港。月未昃而簑常滿。好以鰈餽。鰈寡老幼有疾人。余三造鈞所。與之言而翁已忘。問其年不知。謂之曰。甚矣哉。耄而貪也。瞭于鰈而眊于人。不亦悖乎。翁曰。幼時善記。千萬言猶一字也。常爲人誦時憲書。而里之誼日者。十年廢目。年四十而忘朔望。五十而忘伏臘。七十而自忘甲子。遇熟友如生客焉。余曰。然則猶有能記者乎。翁曰。猶有三見貴。

人。能。記。其。髯。之。曲。見。富。人。能。計。其。瘡。之。坎。見。美。人。能。記。其。鬢。之。紋。此。三。者。老。猶。幸。也。其。他。則。如。鈞。然。得。一。鱖。而。忘。一。鱖。矣。余。曰。然。則。無。有。記。于。此。者。乎。翁。曰。有。余。所。極。不。忘。者。鼠。也。貴。之。冠。鼠。溺。之。富。之。餌。鼠。耗。之。美。人。之。帷。鼠。暴。之。所。不。忘。而。不。能。效。者。也。其。他。則。如。鈞。然。忘。一。鱖。而。得。一。鱖。矣。

乾隆六年辛酉十一月、悟岡退士自孟河渡江北遊、將訪惲甯溪、巢訥齋、於海陵官舍、上廣陵、欲以書問曹震亭於黃山、荆振翔送余至天荒西院、與凌霄子、錢來臣、宿起舞齋、亡友殷至、函讀書處也、遊天荒者、以詩畫留壁間、蛛網蝸篆、蒙以塵蘚、左壁爲主人鄭痴菴起舞齋記、右爲振翔黃歇山圖、而玉函墨葡萄、在其上隅、垂蔓於棟、有鼠懸其上、狸以爲眞也、每循棟攬之、其西則玉函燕子窩、邊花數行、參差濃綠、滿殘陽之詩也、齋後小軒多紫竹、振翔隸書額之、曰竹林何處、訥齋記之、行草欹斜、竹影相互、畫皆漸殘、蝕白堊、黎紫色勝古箋、痴

菴遊京師未返。齋前如荒谷蒙翳。余至。命童子治之。去莽。病菊猶花也。去蔓。稚梅已蕊也。去篠。月季之罍如就。去穀。天竹之粒如授也。削芭蕉。剪海棠。壅木蘭。護牡丹之雛。扶慈竹之孫。而繡魚之盎。但生軒旋。綺石之缶。僅長寒莎。愀然以待主人。而信宿之客。弗遑整也。凌霄子顧而謂余曰。子知夫當境。厭境。離境。羨境乎。亦知夫有心。厭心。無心。羨心乎。厭者。羨之魂。羨者。厭之魂也。天地間。惟有二字。養與教耳。每日略得教養之意。則此日不虛。每事略得好生之意。則此事不虛。凌霄子又曰。末劫。嗤嗤。顛倒。滋甚。以奢爲有福。以殺爲有祿。以淫爲有緣。以貪爲有謀。以吝爲有守。以爭爲有氣。以嗔爲有威。以賭爲有技。以訟爲有才。何其謬歟。任性而濁。任情而薄。任法而酷。任力而毒。不恕孰甚焉。凌霄子善。易得殘易於鄒梅雪。十年大悟。神氣淵粹。虛中無我。謂震林曰。余老無所進。惟服善與自愛益堅耳。振翔曰。先生好獎善。不忍刺人之過。從先生遊者。無矜肆之

士云。

程君雲龍字錦江。號靜齋。別號亨衢。古歛大川。程公第三子也。生有夙慧。善讀書。好莊騷楞嚴。時喟然廢書。歌泣起舞。走無人處。自刺舟蕩月。或倚樹枕石。至夜忘歸。叔水南先生。集名士於淮陰珠湖之曲江樓。見君稚齒。風骨秀異。瞻文辭。語兼莊謔。皆奇之。稱爲不凡。則笑而謝曰。奇我。我則凡矣。爲詩文不拘常格。得句輒作米顛書。書甚疾。筆不及墨。墨不及紙。濃淡傾側如雁行。忽亂相先後。肅肅有聲。一日客求書。疾書云。淮南王始爲腐。乃與丹鉛叟開生面。中山君始爲筆。不與黃白豎結善緣。擲筆屬客曰。寶之。性超曠愷惻。屏棄俗累。熱處眼多冷。冷處則具熱腸。周急每出人意外。兄無波主經畫。任取給不問多寡。知其悉當無濫予。捐殯助婚多厚卹。常隱而不言。戒四子昶、晟、昭、皓曰。施德易。無德色難。省之可免。晚年益疎宕洒落。自稱亨道人。雪輿月舫。隨意所適。吟詠詼諧無

虛日。四子迭爲奉侍。潛命行廚具所嗜食物以從。無遠近早暮。咄嗟而辦。或呼寒士枯僧。泥飲狂舞。不問名氏。隨處訪疾苦人。見急難則出懷中金以與之。有揣其意而曲爲逢迎希望者。則仰視長嘯。以白眼對之。精鑒別。非其友不友。春夜出遊。題道童扇云。半天歸雁月滿地。落花風。又喜吟友人趙闇叔蝶來風有致。人去月無聊之句。往往書之。弗屑與俗人書也。年五十有四。歿之夕。猶端坐爲人定醫方。寫遺訓數紙。字跡如平時。前二日和余梅花詩。聞者以爲仙。白雲教授曰。亨道人有言。居已在狂狷之間。交友在炎涼之外。和光於清濁。頤神於甘苦。葆真遠害以全其天。善哉吾聞其語。見其人矣。

亨道人與白雲教授遇於淮陰之不夜亭。遂爲不夜交。白雲教授稱之曰顛仙。詩酒顛。書畫顛。梅花顛。海棠顛。非夢非覺。是醉是醒。顛之妙乃仙。仙之妙乃顛也。道人性好弄。弄月望曉。弄雪忘寒。劍舞弄俠。棒喝弄禪。造化小兒善弄人。道

人尤善弄造化小兒者。不啻弄珠光滿室。弄花香滿衣也。阮籍之哭。陸雲之笑。曼倩之詼諧。三豐之邈邈。道人乃兼有之。至其以哭爲笑。以笑爲哭。以詼諧爲典則。以邈邈爲清淨。索凡夫解不得也。鶴識字。魚知名。雞談道。蟲誦賦。道人夢中蝶相爲揖讓。胸中鳳與爲品題。翻翩然忘其顛。栩栩然忘其仙也。道人游五嶽。志未果。秋夜登雲臺絕頂。東望扶桑。日輪躍起。海光金紫。有一釣六鰲之想。浩然慨歎。笑弱水之無力。讚夸父之有志。弔精衛之多情。恨女媧之少石。醯雞在甕。錢蚨在囊。愈聞而駭之。指爲顛而未仙也。乾隆丁丑上元後。道人忽化去。白雲教授題其屏曰。遊仙骨。臥佛心。世外知君是我。補天手。行春脚。海西舍爾其誰。

黃補山名烜。弱冠舉孝廉。以河功授泰州別駕。揚州分府劉萊村曰。補山孝於後母。此毛義捧檄之意也。憚寧溪曹訥齋。每以孝友許萊村。稱其姪劉漪霞爲

奇士。乾隆六年十一月。震林渡江訪漪霞。聞補山孝謁之。爲余述三險。請爲記。時補山赴揚州。至馬橋。夜半舟覆。吏衣冰僵立。失本官不知所爲。舟隨流入江口而橫。則補山短裘坐舟背無恙也。而衣不濡。觸橋。橋崩。擊舟首尾俱碎。去年秋。夢觀音大士示以鐵環。方其觸橋柱也。忽然激舟。逆流而却者數丈。聖鐵環乃定。補山四歲時。睡竹屋。火發。門屏皆爆。乳母突火入。補山睡方甯。火四圍焚。枕蓐及身而燬。雍正八年。京師地動。衆呼曰屋崩矣。補山大呼曰母何在。入室覓母。垣崩於背。踊而前。垣崩於胸。瓴甃及足而皆不傷。寧溪訥齋曰。一念而善。鬼神祐之。况純孝乎。覆舟之夕。有尾舟饋金者。補山題其緘曰。感君厚意。還君贈。不畏人知。畏己知。補山喜劍術。以義俠重京師。後師朱高安。乃退然歛意。氣然遇人急難。輒投箸赴之。弗終食。壬子春。聞有鬻婦者。其父故貴官。補山不相識。夜馳數百里保全之。遲明則無及矣。一儒生乞於市。云有喪未葬。爲之謀而

授以館。旬月遁去。乞如初。或以諂補山。補山曰。是或有不得已者。彼自詐。我自信耳。下車相慰問。其人大愧悔。拜曰。人稱公爲小孟嘗。奚止孟嘗哉。補山勇於義。皆類是。年秋乃登第。淡霞君者。喜劍精書畫。自畫紅綫像。書其傳。師事之。善鼓琴能詩。嘗嘆曰。慕才色者。以才色而遷。世有女子而慕義俠者乎。我淡霞君也。與白雪君爲中表訂婚。星者謂當天。父母遂辭婚。白雪君乃月下拭紫漪琴。再拜向淡霞君。撫求凰之操。曲終。月暈如赭。淡霞君乃唏噓拜月而誓。來生賦詩云。送君何限意。一別竟無辭。但去不復問。妾心君自知。年十九而歿。淡霞君色雖媚而正。意雖昵而嚴。幽潔自持。宛轉避嫌。而不欲相遠。白霞君憮然曰。心可負。何忍負淡霞君。色可犯。何忍犯淡霞君也。補山幼時爲白雪之歌。諸名士呼爲黃白雪云。寧溪、訥齋及萊村、漪霞皆有詩以贈之。

天池老人年七十。乾隆八年癸亥九月之望。其生辰也。起東郭孝廉。與浣虛子。



同選貢。老人索其文。以紅綾十二幅請余作唐隸。書既畢。中秋後四日。浣虛子乃與弟夢蘭送余東遊。如意岡。如意岡俗名段岡。老僧德省以苦行建道場處也。募工未集。僧稽首於浣虛子而募其文。復募余以漢隸書之。越六日。浣虛子有疾。冒雨歸唐陵。夢蘭留絆余。雨初霽。與夢蘭西遊自如岡。山人戴世傑爲導。上東山。登太霞峯。西望茅山。嵐氣葱碧。北指新婦嶺。化山土石如赭。從少霞峯東北下。踰龍尾澗。登戴山人之樓。啖菱餌。南望四屏。了髻。磨盤。黃池。諸山。秋色蒼赤。夢蘭曰。樓雖小。幸能見遠。宜欸雪。宜問月。宜贈霞。宜寫煙雨。宜品霜楓。宜叅詩畫。山人曰。水發時。重崖疊磴。有玉龍數十。縱橫相奪。交吼而下。更宜玩也。余遂題其樓曰隱宜。同返如意岡宿焉。初浣虛子之來也。禮佛後。見牢請去豕。僧然之。月夜對紫箕金粟。拉老僧跌坐。說慈悲法。爲鼠請去貓。爲蟲請去鷄。爲蛾請籠燭。爲雀請解網。老僧點頭顧余曰。此金粟如來也。君爲我記之。

萊村劉公。孝友仁恕。產黃紫白三芝於海陵署庭。公幼姪菽歡。以菌告視之。麟如叩之。冰如有光瑩。如有氣蓀。如客曰瑞芝也。皆賀。公謝客曰。聖人之世。祥桑不足以爲妖。蓮蒲不足以爲瑞。何者。妖不勝德。而德或不能勝瑞也。志未惰而天預懲之。業方勤而天早勸之。災祥靈異。天之所爲。懲勸也。天懲天勸。德之所宜無倦也。吾無德於民。而天弗懲。載錫之勸。弗敢信也。惛寧溪曰。主聖臣賢。民淳物阜。國之瑞也。父慈子孝。兄友弟恭。夫義婦順。家之瑞也。愆陽伏陰。苦雨淒風之不忒。天札疵癘之不生。榮光在河。溫波在洛。則有嘉禾歧麥。以彰穡寶。非此之瑞。其瑞維私。公其勉之。巢訥齋曰。是孝友之所感也。公之父伴石先生。早卒。公以賢勞養其母李太君甚孝。公之配胡恭人。婉婉事姑。無私蓄。無私遺。撫諸姪如子。且以德逮下。能不妒也。甚賢。李太君以苦節鞠諸子。訓以忠盡。年七十。愈慈以嚴。敬姜之績。勤於耄期。伯俞之杖。泣於貴顯。不尤盛歟。公之子會川。

姪清源、愷澤。皆受業寧溪。幼而敦行。敬長恤下。非賓祭不衣裘帛。縵袍蔬食。出見紛華弗悅也。子不愛才。臣不愛身。天不愛道。地不愛寶。瑞於家卽瑞於國也。若之何弗賀。乃與賓客爲詩歌以頌之。

書丐。縣東人。施姓。名天祿。富家子。幼讀書。其父惜金。遂罷之。母爭曰。富而失學不祥。父怒曰。學而失金。不其丐乎。丐有異性。娶妻美。見而反走。蹲於廁。咄咄然畏之。居有頃。竊其妻玄緞絳帛。逃而爲丐。逢人輒誦四子書。有宦歸納妾者。賓戚方宴。丐乃額玄緞。肩絳帛。捧杖登堂。將誦書。主人曰。止。先舉一兩字吉則賞。丐指曰。顯者。又曰。君子。且祝曰。富貴。主人軒然大悅。乃撥己杯飲之。丐蹲視曰。幾希。主人曰。少之乎。益以酒。丐酣。揮杖旋舞。鏘然誦書。則齊人一妻一妾章也。主賓大譁。且諍且逐。丐行不輟。誦而出。一日。余方飯。丐至。飯之。勸勿丐。卽丐勿誦書。對曰。然。吾誦於農農厭之。誦於賈賈厭之。誦於士士益大厭。於是廢書而師。

蛇。丐。蛇之性糾而毒。師於猴。丐。猴之性淫而險。師於犬。丐。犬之性貪而穢。乃執贄而叩蛙。丐焉。發匣出巨蛙一。小蛙十。左侍五。右侍五。命曰講。巨者鳴。小者默。命曰讀。巨者一鳴。小者再鳴。巨者再鳴。小者爭鳴。閣閣然沸耳也。顧而嘻曰。難遂還而習書。丐。余曰。然則妻美而畏之何歟。對曰。噫。吾以子爲聞道也。不然哉。不然哉。不見夫蟻。蠓乎。噫。以天風。春以天雨。造物者戲之耳。我適醜而彼適妍。我適愚而彼適巧。彼方且牡牡然熱其所匹。冷其所不敵。而我乃雌雌焉禱其所冷而視之熱也。是鑄醜而釀愚也。不亦疥而爲癰矣乎。乃誦書而去。

嗟翁居洮湖上。喜放生。蛇困蛙。螳困蚓。蠓蝟困蝶。螿蟻困蟬。必救之。自結茅築土爲室。製方扁。題以一字曰嗟。或稱爲嗟翁。則應曰嗟。積破書百餘帙。皆婦人納針線者。而易之以紙也。辛酉秋。客約震林問放生之道。翁曰。幼時拾螺於道。有笑余者而止。旋悔曰。一笑之辱輕。一名之珍重也。農者斷蛙於鋤鎌之下。無

心也。無心則無過。不忍者猶怵然憫之。睇而嘆曰。孽斯萬物之怨釋。造物之憾平矣。震林避席再拜之。翁曰。與富言吝。與貴言驕。與才言狂。與力言猛。弗悅者十之一。與貪言好施。與忌言好獎。與侮言好讓。與暴言好生。悅則彼爲福。否則吾無過也。余拜曰。先君子之誨震林也。語多合矣。客曰。今者禍福之報。不漸爽歟。翁曰。不然。此憤世之言也。福莫大於陰德。禍莫大於陰惡。口慈意忍者。鬼神惡之。善重惡輕者。天所宥也。客曰。僕窘於衆。亦屢矣。翁曰。多疑者勿與遊。多欲者勿與儔。多鄙者勿與求。多詐者勿與謀。多妒者勿與脩。以自全也。將退。翁留飲。既暮將別。翁執予手曰。敝廬之辱君也。應不數矣。更有獻於君。自伐者無功。自專者無成。自利者無親。自是者無明。自滿者無終。自銜者無名。余謝曰。敬受教。翁姓呂。鄉人略其名。第呼爲放生翁。

悟岡退士訪隱者於西山北。自鬱岡南至屋山百餘里。巖壑皆遍遊。費缺。爲人

作書畫以補之。孫文廣問曰。餽而有受。有不受。何也。悟岡退士曰。嘗學奕。奕叟教余云。窘者勿壓。吝者勿拔。無掩以相捺。無追以相軋。夫敗一則懟。失一則悔。面擦手瘡。目喪神而口生鬼者。宜生之不可殺也。饋有禮。受亦有道焉。先君子湘浦公。嘗誠震林矣。貧者。僧者。勢無奈者。刻取而薄與者。迹穢而名辱者。未割而先痛者。皆却之。非不恭也。文廣性磊落。負奇氣。見脂韋媚世者。面唾之。以結友。貧其家。鄙夫笑爲愚。遊如意岡。夜話浣虛子悅而稱善。余之訪許北文也。文廣與倪叙五偕。送盃茗畢。卽歸珠岡。鷄初鳴而文廣又至。珠岡遠十餘里。道皆松壑。多鬼魅。文廣晦夜信步。高歌屈原山鬼篇。過荒塚。有聚火若輪。薄而叱之。映然四爆。散爲萬星。燭路數里。文廣登高四顧。大叫曰。奇觀也。步數里。光滅。黑氣如堵。乃鼓腹直前。張口吸之。曰。鬼耶。吾吞爾。鬼悲嘯而滅。返顧見月上髻山。光圓如望夜。漸高則虧。而餘線。余聞之。問曰。子厭鬼乎。笑曰。鬼何厭。厭似鬼者。

耳。

乾隆八年癸亥九月朔。孫文廣夜至許北文敬玉草堂。北文請遊浮山。從山北十八盤而上。山頂平廣可五六里。無竹樹。有觀音樓。尼如月守之。碑云浮山爲句池地。肺爲請虛之府。浮而不沉。故名。康熙二年。句容隱士秋水江砥之所書也。南至逍遙巖。入朝陽洞。中有方池。名太一泉。與觀音樓後太乙井。皆甘冽。治胸結之疾。復登巖。坐石而望。南指東盧中山。乃雍正壬子秋七月。與張霞飛、張夢瞻。曾一過之。未登也。西指秣陸溧水諸山。千百層出。罕辨其名。西北爲棲霞山。己酉前七月。與新安曹震亭。題詩縹緲峰。以未遊寶華山爲恨。而寶華山有文海上人者。余在京師法源寺。天月上人。託余書震亭文爲屏。以壽之者也。北望京口五州山。乃二十年前登絕頂。俯長江。作采芳歌二篇。而今已忘。東北爲鬱岡三茅諸峰。乾隆庚申春。與毘陵趙闇叔。及張夢旃。爲旬日遊。而余於茅

山凡六七至矣。東則方山。康熙丙申中秋日。與王雲古訪陸道人。一宿其頂。道人化去。桃千觀尙無恙乎。髻山之陽。有石如屋。俗名瓦屋山。則浮山脉所自來也。下有疊石中空。俗名鷄籠。高數十仞。爲浮山之頂。朝陽洞向之。雍正六年戊申冬。與溧陽董應秋。訪秀和尚於屋山之巔。聞和尚坐化。遺蛻如生。凡此者山數千里。事數十年。乃今於浮山一感慨之。以浮生視浮雲。又何如也。於是西段獅子巖。以望赤山。北文獨立大石。誦郭景純天光發新朝海拱辰之語。周指脈。終向背。千里一掌。余嘆曰。遊山可少君乎。醉陰夢陽。山警水聾。乃覺載醒。乃明載聰矣。日已昃。從落星岡而下。有洞在懸巖間。不可上。遂循芙蓉澗折花以歸。倪紱五待於敬玉草堂。劉祖瞻、俞夢蘭待良久。先去。文廣曰。浮山之遊。得數君當益豪。期於重九日補之。

余與俞夢蘭步於棠陵之野。夢蘭有所見而笑曰。世有四愚。莫之砭也。苛於令。



殆於病。寒於手。贅於口。九泥而不能一聳者。此之謂酒愚。蠹於身。崇於家。奸於野。償於室。九詛而不能一祝者。此之謂色愚。吝於涼。濫於炎。嗇於芳。豐於穢。九怨而不能一感者。此之謂錢愚。聰於古。聾於今。瞭於理。盲於情。九躓而不能一行者。此之謂書愚。歸而以告浣虛子。浣虛子曰。抑有三焉。附之則喜。激之則起。不主理而徒主氣者。此謂任俠之愚。坐如橋木。行如孤鶴。畏苦行而喜甜果者。此謂逃禪之愚。御女茹葷。外熄中焚。不好生而冀長生者。此謂學仙之愚。是三者非以歛福。適以叢孽也。越數日。天池老人遨遊東山草堂。草堂東向大茅峯。三里而近。積金華。姥桃花諸峯。可辨竹樹。憶於乾隆五年春。同趙闇叔、張夢旃、於曲湖。登茅山。以望棠陵。不能辨浣虛之宅。俯視山足。有翠筠。白屋。幽朗。諸異。晚霞所落。適繚繞之。闇叔擬爲有娟然絕世。低徊皎潔。人隱於其中。或可作吾輩主人。倘卽知老人處。殆與闇叔來矣。天池老人撫膺而期他日。

顛媛鍾離氏。妍慧莊靜。年十九嫁於楊。三年夫死。哭數月。遂狂。披髮登竈而歌。時升屋。跨鷓尾。呼天痛哭。逾年。忽能視鬼。說冥中苦報。代死者言笑如生。家人秘密。揭之無脫。里有妻死而遺子五齡者。後妻虐之。一日召顛媛。設香果。令視鬼。顛媛乃靚妝傅粉。展元帕蒙首。隱几如睡。俄欠伸。蒙帕欻欻欲起。復隱几。頃之。嗚嗚有聲。掀帕投地。顧遺兒。指曰。兒來。則痛哭。淚溼兒髮。抱兒曰。休矣。吾將祈于天矣。如我而訴者。百餘人。皆具後母虐子狀。穢食者。廁臥者。炙膚者。摘鬢者。肩重而脊折者。掌杵而臂攣者。禁其讀而奴婢之者。怒其拙而犬彘之者。疇弗能言而加詈。疇弗能步而加撻者。裸之而暴於日者。跣之而涉於冰者。期月者。週歲者。未言學語者。啼乳而濡絮塞口者。號飯而潑糠噎喉者。足已跛。目已眇者。瘵者。夭者。妻虐妾。主虐婢。慘亦如之。同我而訴於天者。又千數焉。復哭曰。休矣。吾兒其弗生矣。兒亦抱膝呦呦而啼。如真母焉。環而聽者。淚如雨。未幾

後妻死於鬼。復招顛媛。後妻附顛媛言苦報。且勸人無效我虐前子也。環而聽者汗如雨。顛媛頗知書。過村塾。徑入登座。呼學子聽講。乍見孺子章。塾師叱曰。荷。顛媛卽其面。擲揄曰。孔孟書。我顛媛誦也。口臭翁吠聖賢耳。少別數秋。迅速如是。潤質就稿。靈機轉晦。可不悲耶。如來說世界非世界。是名世界。凡夫非凡夫。是名凡夫。不可悟耶。閻浮提一切。阿彌陀佛。一晝夜。阿彌陀佛。一劫。袈裟幢。天一晝夜。不可想耶。世尊云。南閻浮提衆生。其性剛貪。難調難化。舉止動念。無非是罪。無非是業。不可畏耶。震林老母去世之後。一切世味。百生厭心。一切世緣。皆生悲想。離嗔離欲。常念觀音。豈宜屢墮輪迴。亂投胎腹。一夢未蘇。一夢旋續。竟無醒時耶。溷蟲擾擾。糞溺爲生。在人視之。深可憐憫。彼有性靈。猶欲離溷。升崖。蟄土。蛻形。化爲羽族。世界如溷。我輩如蟲。逐臭慕羶。認苦爲樂。仙佛視之。更可憐憫。有性靈人。奈何生死輾轉。顛倒窮劫。不自痛悔耶。君與栖梧高士。乃

第一有性靈人。學文而豪。學詩而聖。學醫而神。學堪輿而仙。奈何不學禪而佛耶。癸亥冬晚。話別姬山。雪意湖聲。到今留夢。明年春與孟納齋同。邑張玉麟。王雲古。西游句曲。訪兪子浣虛。共話無生。而生趣始得。秋又與納齋北游海陵。赴同年凌靜圃之招。重九後返舟。南游姑蘇。石杉長老。請登天平絕頂。以望太湖。十月之杪。別納齋。獨訪王澹園於張夢旃地肺山莊。仲冬朔。道叟沈一清。請游茅山。歸後會澹園。今年春游石臼湖。回顧華陽。同浣虛避暑觀音晶舍。重話無生。而生趣益啟。七月之望。以兒子志廉有疾。遂返洮湖。曹震亭下第出都。請游黃海。送至孤山。重九後始歸。徒爲擾擾耳。在虎邱則厭虎邱。在西湖則厭西湖。厭人且厭境。厭身且厭心。玉勾詞客約遊蘭亭不往。在山陰則又厭山陰矣。村邑爲埕。人民爲蟻。名利情欲。坑盡衆生。揮手登高。眉軒四望。悲滿人間。詩弟子黟山倪哲如。雪懷寡滓。跡寄市廛。神栖蓬閬。不厭世而能離世。似謀利而轉忘。

利者以舟迎志廉。遣疾皇里埠之半芋山房。九月十九。遂携兒泛洮東。過晚步。夜泊鐵橋河尾。余獨留鐵橋上人梅花禪榻。上人遠游未返。其徒二人。慧海。天際。鍵戶力田。余爲坐守。荒刹無鄰。野鳥啄案。鬼物或言此中有味有情。忙者固未參耳。詩弟子李奕敬。居母憂。屏暈酒。毀形滅性。幼弱爲難。求之老成紳士中。罕有能及。給余茶米。慰此靜栖。相對坐忘。兩不相厭。君能一掉來游否也。選期已迫。宦情甚冷。十月朔。將携兒過琴溪訪蒼如上人。同探張氏名園東。飲天下第二泉。倘有同心。幸同行也。二親既逝。百年強半。遊蹤所厲。每愛僧枯。代彼此邱。一上晚香。叩曉鐘。稽首世尊。少憊宿愆。媚佛以詩。餐僧以畫。畫性宜靜。詩性宜孤。縱意所成。或非而似。近來十夢。九依淨土。雖非眞境。亦非幻緣。期與天下有性靈人共之。此與趙閣叔書也。作此書時。李生適至。旋寫旋讀。花影在硯。蛩語近床。或有叩門。答以僧去。嗟乎此境。又不可留矣。



A541 212 0019 7677B

西青筆記

八〇

乾隆四十四年五月既望。刪削於瓜渚草堂。期得知音有資者。翻刻以爲定本。并將新舊詩詞。亦加刪改。不致蕪冗泛濫。而乏趣味風韻也。

悟岡記時年八十有七歲


再跋

昔人有言。作文易。改文難。改文猶易。自改文難。自改文尤易。痛刪自己之文。爲難。鄉同年馮養泉云。樸而穠。斷亂以爲工。詞簡意繁。絕世之筆。

八七老人記

汪翰校讀

175871



中華民國二十四年十一月出版

西青筆記

著者 史 悟 岡

出版者 大達圖書供應社

發行人 周 健 人

發行所 大達圖書供應社

上海河南路  
一三七號

分發行所全國各大書坊

洋裝一冊定價五角



~~F25871~~

洞庭圖書室